

WANTOK



OCEAN BLUE

Tuna in oil
Rait teist
yah!



Wan Wik, Septemba 29 - Oktoba 5, 2005 NAMBA 1628 Niuspepa bilong yumi ol PNG stret! K1.00 long Mosbi tasol - Ausait Mosbi K1.30



Prinses Anne i kam pinis

- Lukim stori na ol piksa long Pes 3

Poto: NICKY BERNARD

Pes 2 -
Noken sapatim
lidasip lo senis



Pes 7 -
PNGDF redi long
karim kopi long
Hailans bus ples



Skelim strong bilong NRL gren fainol

Pes 29



VS




PowerMate PETROL GENSETS

RELIABLE

Available in different sizes to suit your application.
Feature: Circuit Breaker, Battery Charger, Volt Meter & Long Run Tank

FATHER'S DAY GIFT IDEAS!
SUNDAY SEPTEMBER 4TH



Model: 5GF
Code: 137964
5kva
K 2,965



Model: 3GF
Code: 137960
3kva
K 2,295



Model: 2GF
Code: 137958
2kva
K 1,295



FREE 18W FLUORO
& POWERBOARD

FREE
GIVEAWAY

with every
purchase of a
Powermate Petrol Genset!

Brian Bell
Shop with a friend

POWERCENTRE 325 8066 BOROKO 325 5411 HCC, GORDONS 325 8469 HCC LAE 472 3200 TOP TOWN 479 1918 GOROKA 732 1622 MT HAGEN 542 1999 KOKOPO 982 9027 MADANG 852 1899

Noken sapotim lidasip lo senis

Andrew Molen i raitim

PAIT bilong ol pipel wantaim Transperensi Intanesenol (TI) PNG na Papua Niugini Midia Kaunsil agensim senis bilong tupela lidasip lo i go het yet na nau i kisim sapot bilong Gavana bilong Westen provins, Dokta Bob Danaya.

Dokta Danaya bai kisim wari bilong ol pipel i go long palamen taim palamen i sindaun gen long Oktoba.

"Mi bai salensim ol narapela memba bilong palamen long i noken sapotim dispela tupela bil bilong wanem ol i no gutpela long ol pipel bilong yumi," Dokta Danaya i tok.

"Mi laik askim ol long vot agensim dispela ol bil," em i tok.

Praim Minista Sir Michael Somare i tokaut olsem em i no inap sapotim dispela bil we i askim long husat memba i asua long opis bai noken lusim opis bilong em.


"Mi singaut long ol narapela memba long sapotim Praim Minista long noken sapotim dispela bil," Dokta Danaya i tok.

Em i tok tu olsem ol i noken sapotim narapela bil we i askim long gavman i mas apim mani mak bilong ol memba o ol "Slush Fund" long K500 000 i go long K1 500 000.

"Dispela mani i mas i go long kamapim sampela gutpela wok," Dokta Danaya i tok.

Dokta Danaya i tok nau yet i nogat wanpela memba i kam toktok long em olsem ol i sapotim dispela tupela bil o nogat tasol em i laik bungim sampela na toktok wantaim ol long traun na winim lewa bilong ol long i go agensim dispela ol bil.

Em i singaut long ol manmeri long soim sapot bilong ol tu na sainim o putim mak long ol petisen we TI (PNG) na PNG Midia Kaunsil i salim i go aut.



SANAP STRONG: TIPNG na Midia Kaunsil bilong PNG i sanap strong wantaim Gavana bilong Westen Provins, Dokta Bob Danaya long pait agensim tupela bil i kam long tupela memba bilong palamen.

Siaman bilong TI (PNG), Mike Manning i tok ol i amamas long ol bekim i kam long ol pipel we i lukim planti i sainim pepa pinis.

Mista Manning i tok dispela bai lukim na traun tru tingting na strong bilong ol pipel.

"Mipela i lukluk long traun na kisim olsem 2000 o moa hanmak bilong ol manmeri," Mista Manning i tok.

Dispela kempen i go agensim tupela bil we memba bilong Nuku, Andrew Kumbakor na memba bilong Laigap Porgera, Kappa Yarka i kamap wantaim na i laik kisim i go

long palamen bai ol memba i ken vot long ol pastaim long ol i kamap lo.

Mista Yarka i laikim lo bilong ol lida aninit long seksen 27 (a) bilong ogenik lo long wok bilong ol lida na wanem samting ol i mas mekim we i tok husat memba i asua long opis bai ol i rausim em long opis inap tripela yia.

Tasol ol bai kisim ol narapela mekim save yet sapos ol i asua.

Mista Yarka i laik senisim dispela lo bai husat memba i rong bai i no inap lusim opis.

Narapela senis long lidasip lo we Mista Kumbakor i laik senisim em long apim mani mak bilong ol memba long K500 000 i go long K 1, 500 000.

TI (PNG) i ting olsem nambawan bil bai i no i nap long helpim kempen bilong gavman long pait agensim korapsen na tu planti moa manmeri bai i kisim taim sapos ol memba i mekim nabaut na i no pinis long opis bilong wanem ol i stap yet.

Long namba tu bil, Mista Manning i tok, "PNG i no wanpela kantri i gat planti mani olsem planti manmeri i save tingim na toktok.

"Yumi wanpela turangu kantri tasol planti i save ting olsem yumi i gat planti moni na wanem liklik moni yumi i gat i mas i go long gutpela rot."

Em i tok ol i bilip olsem 2007 ileksen i kam klostu nau na planti ol memba bai laik long sapotim dispela bil bilong wanem ol i ken yusim dispela mani long taim bilong ileksen.

Dokta Danaya i tok tu olsem hap bilong dispela kempen bai ol i putim nem bilong ol memba husat i sapotim na husat i agensim dispela ol bil long niuspepa, TV na radio bai ol pipel i ken save memba bilong ol i stap long we.

"Neks ileksen bai yumi yusim limitet prefrensol voting sistem (LPV) na dispela i wankain olsem olpela rot bilong vot we yu ken kisim namba long famili o ol Wantok bilong yu tasol.

"Long LPV yu mas kisim namba long olgeta manmeri insait long komyuniti o eria yu stap long en, pawa bilong ol pipel nau bai kamap ples klia," Dokta Danaya i tok.

"Taim yumi amamasim namba 30 independens yumi tok 'Putim PNG Fes' na olsem wanem nau, lus tingting long yumi yet na putim PNG i go pas," Dokta Danaya i tok.

Tingting bilong ol narapela manmeri:

Banis bilong ol lida i asua long kisim mekimsave i no stret

KATOLIK Bisops Konfrens i tok olsem dispela bil bilong banisim ol lida long noken lusim opis taim ol i asua i kranki tru.

"Nau yet lo i stap we husat lida i asua long wok bilong em bai em i mas lusim wok. Husat manmeri i hofim pablik opis em i wokmanmeri bilong olgeta pipel.

"Em i kranki tru long tok olsem bosman bilong ol manmeri i no inap rausim man long wok. Tasol dispela senis long lo i laik strongim dispela.

"Planti lida i kisim nem nogut long bagarapim pipel bilong Papua Niugini. Hamas taim bai yumi lukim ol dispela lain i painim rot long abrusim mekimsave? Ol i save painim ol kain kain rot long abrusim mekimsave. Ol i save lusim wok bilong ol, na abrusim mekimsave.

Taim ol memba bilong Palamen i abrusim

mekimsave, komyuniti i save karim hevi. Komyuniti i mas gat bilip long lo bilong kantri."

Dispela toktok i bin kam long Bisop Francesco Sarego SVD, Presiden bilong Katolik Bisops Konfrens bilong Papua Niugini na Solomon Ailaris. SIAMAN bilong PNG Wokas Welpe Fan, Napoleon Liosi i autim tingting long dispela tupela bil.

Em i tok dispela tupela bil i kamap long ol lida husat i nogat tingting long sindaun bilong ol pipel.

Em i tok namba wan bil bilong banisim ol lida long mekimsave na lusim opis taim ol i asua i kamap long tingting bilong sanapim tupela kain lo. Long namba tu bil, em i tok dispela K500,000 i no lusim wanpela hanmak na long apim mak bilong mani bai no inap kamapim wanpela gutpela samting.

Mista Liosi i singaut long olgeta union wokmanmeri, ol Kristen manmeri na ol memba bilong Palamen long sanap agensim dispela tupela bil.

PNG i namba wan long indai long maus bilong snek

Iona Reto-DWU sumatin- i raitim

PNG i stap namba wan long wol long dai bihain long posin snek i kaikaim ol.

Dispela ripot i kamap bihainim wanpela menesmen woksop i sut long snek i kaikaim man ol bin holim long Divain Wod Yunivesiti long Madang las wik.

Moa long 100 Helt Woka na Helt Ekstensen sumatin i bin pinisim wanpela wik kos long menesim snek bait.


David Williams bilong Venom Rises senta long Yunivesiti bilong Melbon long Australia i tok as long man i dai bihain snek i kaikaim em ol i no givim rait marasin bikos enti venom marasin

i kostim bikpela mani tumas.

Em bin tok i nogat save asples man tumas i stap long givim marasin na hevi we dispela i kamapim i narapela samting.

Em i tok snek i save kaikaim moa long 6,000 pipel olgeta em snek i save kaikaim ol long olgeta yia tasol ol statistik ripot i soim 1,000 long ol lain i kisim birua long ol snek posin i save sik na 200 i save dai long wanpela yia.

Mista Williams i tok ol i ken stopim ol dai i kamap tasol bikos nogat gutpela trening, marasin na marasin long stopim posin bilong snek i go insait long blut na ol man i save dai.



Prinses Anne kamap long PNG

NAMBA wan pikinini meri bilong Kwin Elizabeth, Her Royal Haines Prinses Anne i bin kamap long Pot Mosbi long 5 kilok Trinde apinun.

Liklik jet balus bilong em i bin pundaun long Jacksons Ples Balus long 5 kilok stret wantaim flek bilong Yunaitet Kingdom (UK) na PNG i plai antap long het bilong balus.

Klostu samtung olsem 5000 manmeri i bin kamap long Jacksons Ples Balus long lukim Prinses Anne i kam.

Dispela raun bilong Prinses Anne em i makim tripela ten

krismas bilong independens bilong yumi.

Brata bilong em, Prins Charles i bin stap long makim independens bilong kantri long 1975.

Laspela taim wanpela memba bilong Royal Famili long Ingran i bin kam raun long PNG em long 1991 long taim bilong Saut Pasifik Gems.

Prins Andrew i bin kam long dispela taim.

Raun bilong Prinses Anne i bin stat long Trinde nait yet we em i bin sindaun bung wan-

taim ol bikmanmeri bilong ol ovasis misin i stap insait long kantri wantaim ol bikmanmeri bilong gavman na bisnis.

Stat long tude (Fonde) Prinses Anne bai go raun lukim matmat bilong ol paitman bilong woa long Bomana ausait long Pot Mosbi siti. Dispela em namba wan wok bilong em.

Bihain long en, em bai raun i go lukim Anglike Stop Aids Senta we ol lain Angliken sios i save halivim ol lain manmeri husat i gat dispela sik nogut.

Prinses Anne bai raun i go lukim tu Sesala Homs, Pot Mosbi Jenerel Haus Sik na Koki Dvelopmen Senta.

Bikpela wok bilong em long makim tripela ten krismas independens bilong kantri em long givim aut ol namba wan medol bilong Papua Niugini yet long Palamen Haus.

Em bai lusim Pot Mosbi long 4 kilok apinun.

Lukim Komentri - PES 15 Na bai i gat moa stori long raun bilong Prinses Anne neks wik.



PRINSES Anne i kamap pinis. Planti manmeri i bin stap long ples balus long tok welkam long em.

Bikpela luksave i go long en long kam raun long makim tripela ten krismas bilong kantri bilong yumi.

TOK i go pas pinis olsem ol pipel long Mosbi siti i amamas olsem Prinses Anne i kam raun lukim ples bilong yumi.

Tasol planti moa i wok long askim. Olsem wanem long ol rot i stret insait long 6-pela mun tasol? Bai olgeta wok i kamap pinis long stretim ol lait bilong rot na pulamapim ol hul long rot i go het bihain long Prinses Anne i lusim kantri o nogat?

BIKPELA asua i wok long kamap yet. Planti manmeri - ol niusmanmeri tu - i wok long tok stori long kamap bilong Prinses Anne, tasol sampela i wok long tok olsem kwin i kam. Man, sapos kwin i kamap long hia, bai olgeta manmeri long wol bai save ya. Em i orait...em stail bilong yumi PNG ah.

TOKSAVE: Yu save bungim hevi taim yu go long benk? Yu gat bel kros long ol gavman sevis i no wok stret?

O yu belhat long sampela paul pasin i kamap insait long kantri bilong yumi? Nau yu ken ritim stori bilong ol kain kain hevi ol liklik manmeri i save bungim.

Planti taim yumi harim stori bilong ol bikman tasol. Nau yu ken kisim tru tingting bilong mipela ol liklik manmeri.

Wantok Niuspepa i statim wanpela nupela hap kona bilong skelim tingting. Nem bilong dispela nupela kona stori em 'WANTOK SISTEM' yu ken lukim namba wan stori long PES 15.



BUNGIM SIR MICHAEL: Prinses Anne i bungim Praisin Minista Sir Michael Somare na Lady Veronica.



TOK HALO: Prinses Anne i bungim Foren Afes na Imigresen Minista Sir Rab-bie Namaliu.

Save moa long Her Royal Highness Prinses Anne

Taitol: Princess Royal, namba tu pikinini na wanpela pikinini meri tasol bilong Kwin bilong Ingran. Em i kisim dispela taitol Princess Royal long Kwin long Jun 1987. Em i namba seven meri long holim dispela taitol.

Skul: Princess Royal i bin skul long wanpela praivet skul long Buckingham Palas yet, haus bilong Kwin Elizabeth na famili bilong em.

Marit: Princess Royal i maritim Rear Admiral Timothy Laurence husat i kam raun wantaim em long PNG.

Pikinini: Namba wan pikinini bilong Princess Royal i kamap long 15 Novemba 1977 - Peter Mark Andrew Phillips. Em i karim namba tu pikinini bilong em long 15 Me 1981 - Zara Anne Elizabeth.

Wok na laik bilong em: Princess Royal i bin stat mekim pablik wok taim em i 18 krismas tasol. Save The Children Fund, em wanpela grup we em i presiden long en stat long 1970 yet. Em i save wok strongim wok bilong fan long helpim ol pikinini long wol.

Em i save go raun ovasis tripela taim long wan wan yia. Long 2004 Her Royal Highness i mekim samtung olsem 599 raun insait long UK yet na ovasis tu.



ESKOT: Komanda bilong PNG Difens Fos Komodor Peter Ilau i wokabout wantaim Prinses Anne i go long lukim Gat ov Ona.



GLASIM: Prinses Anne i sekim Gad ov Ona bilong PNGDF.



JUST ARRIVED - PRESENTATION A4 QUALITY COPY PAPER

data-max
Premium Quality White
A4 Copy Paper 80GSM

PRODUCT CODE : 4780

1-99 reams
K13.97
PER REAM

100+ reams
K12.10
PER REAM


All Prices are inclusive of GST.



Waigani Drive, Port Moresby

Tel: 325 6500

Fax: 325 0302



Ol papa bilong Mama Lo autim wari



Laki Manki... SHANNON Bultin, wanpela liklik aipas manki i gat 10-pela krismas em i pikinini bilong Sir Bato Bultin, namba wan primia bilong Madang. Em i bin kirap nogut tru taim Rijinel Memba bilong Madang na Inta Gavman Rilesens, Sir Peter Barter i bin givim wanpela kibot na rekoding saun sistem long strongim em long pilai musik. Sir Peter i tok olsem em i bin harim wanpela rekoding bilong Shannon sampela mun i go pinis na em i ai op tru long strong bilong dispela yangpela manki long pilai musik. Em i bin baim ol musik masin long givim long Shannon husat i bin stap wantaim mama bilong em Rachel na ol poroman bilong em.

I GAT wari long nogat gutpela luksave i go long ol lain i bin hatwok long kamapim Mama Lo bilong kantri insait long 30 independens aniveseri selebren.

Sir Matiabe Yuwi na John Kaupa i makim ol memba bilong Konstitusenel Plening Komiti (CPC) bipo long PNG i bin kisim independens long 1975 i autim dispela wari insait long wanpela stetmen.

Ol i tok pasin we ol lain i bin go pas long ol opisel selebren long 30 independens aniveseri i wokim long abrusim ol i soim olsem ol i nogat luksave long Mama Lo na rot em i bin kamap long en.

"Long sampela long mipela, dispela i bin salim tingting i no gutpela tumas long Mama Lo na ol dispela i bin helpim long kamapim na mipela i no bilipim olsem Praim Minista o husat man moa i bikpela man antap long gavman i klia long histri bilong PNG i bin tingim dispela.

Olsem na mipela i laik tokaut long tingting bilong mipela," Sir Mathias na Mista Kaupa i tok.

Long makim ol foma CPC memba, Sir Matiabe na Mista Kaupa i tok 30 independens aniveseri i makim tu 30 krismas long Mama Lo bilong kantri. Tasol ol bin lus tingting long Mama Lo na ol lain i kamapim em.

"Mama Lo i as Lo PNG i sanap long em, lukautim kantri na as long wok gavman i laik kamapim. Mama Lo i bikpela hap lo na stetmen long ol gol na wok insait long histri bilong PNG.

Tasol Mama Lo na ol lain i bin hatwok long kamapim em ol bin abrusim ol long go insait long sampela bikpela samting long dispela 30 independens aniveseri. Dispela i no wari bilong mipela tasol, nogat.

Em i samting bilong pasin. Sapos Mama Lo na ol lain i kamapim i no kisim gutpela luksave, bikpela hap long histri na rot long lukautim kantri i no kisim luksave em i mas gat long em.

Luksave i mas kamap long pablik long Mama Lo na ol lain i mekim kamap na long bikpela kontribusen bilong ol long kantri.

Wantaim komitmen o luksave long ol lo we Mama Lo bilong kantri i beis na dispela i karamapim luksave olsem PNG i wanpela independens kantri na bihainim

kalsa na pasin bilong yumi, mipela i wokim ol dispela toktok," Sir Matiabe na Mista Kaupa i tok.

Taim ol i amamas long tupela wanwok long CPC em Praim Minista Sir Michael Somare na John Momis i kisim luksave long Logohu Awod, em awot sistem yet bilong yumi long PNG, tupela Sir Matiabe na Mista Kaupa i tok tupela husat i kisim luksave na husat i nogat.

Tupela i tok ol i raitim pinis pas i go long Praim Minista long tokaut long no amamas bilong ol na askim em long wokim samting long stretim dispela.

Long wankain taim, tupela i tok ol i amamas long gutpela 30 independens aniveseri i bin kamap.

"Mipela i amamas long lukim Mama Lo mipela i bin helpim long kamapim i go het long givim gutpela stia long gavman na kantri," tupela bikman i tok.

Sir Peter singautim ol Bogenvil lida long tingting na toktok

OL BOGENVIL lida i kisim toksave long tingting long ol narapela taim ol i wokim ol pablik stetmen.

Inta Gavman Rilesens na Bogenvil Afeas Minista Sir Peter Barter i tok.

Em i tok woa long Bogenvil i bin kamapim bikpela hevi, wari na dai long Bogenvil na nau yet, kanti i wok long

bungim yet hevi bikos long ol bagarap long ol rot na ol arapela bikpela samting. Na ol sevis tu i bin bagarap.

Em i tok gavman na ol komyuniti i wok wantaim nau long bungim ol risos bilong kamapim bek gutpela sindaun.

Em i tok kantri i bin sapatim wok bilong kamapim gutpela sindaun na Nesanel

Gavman i wok long bungim ol salens long go hetim ol samting i stap insait long Bogenvil Pis Agrimen wantaim sapat bilong tupela sait bilong gavman.

Na em i tok i no gutpela long ol Bogenvil lida i wokim ol tok bilas long ol kontribusen Bogenvil i bin wokim pastaim long wok mani bilong PNG o tok long

sampela wei, Bogenvil i gutpela moa long ol arapela provins bikos dispela i kamapim bel nogut.

Em i tok wankain tu long ol stetmen we i laik kwestenim rot na taimtebol i stap insait long Bogenvil Pis Agrimen.

Minista i tok Bogenvil Pis Agrimen em i wok bilong olgeta grup long

PNG, Bogenvil na ol patna i bin helpim long wok bilong painim gutpela sindaun olsem Australia, Nu Silan, Fiji na Vanuatu na olgeta gutpela wok kamap em wok bung bilong olgeta lain.

Em i tok gutpela pablik sapat i kam long PNG na mani long putim i go long sapatim ol restoresen wok, developmen na wok mani long sapatim otonomi we bai kampim gutpela sindaun.

"Aninit long ol dispela, i gutpela long husat i wari long bihain taim bilong Bogenvil long tingting gut long ol toktok na ol samting ol i laik mekim.

"Olsem Minista long gavman we i laik onaim ol samting i stap long Bogenvil Pis Agrimen na go hetim ol lo, mi no laik tagetim wanpela man o grup o ogenaiesen tasol ol toktok bilong mi i sut long ol lida ol pipel i makim ol, opisel long olgeta level, ol arapela lida na ol lain i laik sanap olsem ol lida," Sir Peter i tok.

Em i tok i gutpela long i no kamapim birua tasol olgeta i wok bung wantaim na noken kirapim bel kros namel long ol pipel bilong Bogenvil na ol narapela hap bilong PNG.

Chan putim petisen long rot mani

NU Ailan Provinsel baset bilong neks yia i mas katim K12.5 milien long stretim ol rot na bris long Namatanai ilektoret, Namatanai memba Byron Chan i tok.

Mista Chan i putim petisen i go long Nu Ailan Gavana lan Ling-Stuckey long katim inap

mani long 2006 baset bilong provins bilong helpim karimaut ol wok mentenens long ol rot na bris long Sentrel, Namatanai, Konoagil, na Tanir Lokol Level Gavman eria long Namatanai.

Mista Chan i tok Trensport netwok long Namatanai ilektoret i bagarap tru bikos ol i no wok long karimaut ol wok mentenens long ol. Na sapos ol i no wokim, ol gavman sevis na wok long hap bai pas.

Em i tok taim ol hap rot netwok i pas, klostu 65,000 pipel insait long distrik bai i no kisim ol semis i go long ol maket long salim ol kes krop na ol arapela samting ol i groim.

Em i tok ol ples balus long distrik i pas i stap tu. Praivet ples balus tasol long Lihir i op i stap, Mista Chan i tok. Na wankain tu long ol wof o bris.

Em i tok olsem lida ol pipel yet i votim em long makim ol, em ino inap long pasim maus na sindaun nating na lukim ol atoriti i giamanim ol pipel bilong em.

Olsem na em i salim petisen i go long Gavana Ling-Stuckey bilong wokim samting na katim inap mani long Namatanai Distrik long baset bilong provins long neks yia.



Not Baining laik kirapim bek ol kokonas plantesen

...CCI na NARI i ken helpim

Maisan Pahun i raitim

BIHAIN long tripela ten krismas (30) na ol lain long Lasul distrik Not Baining eria insait long ls Niu Briten provins i lukim sevis bilong wok didiman i go insait long ples bilong ol.

Dispela wok didiman sevis i bin kamap taim Kokonas na Kakau Institut (CCI) na Nesanel Agrikalsa Risets Institut (NARI) long Keravat i bin karim wok didiman i go long hap.

Lokol Level memba bilong Lasul Distrik Henry Kusak i singaut long ol lidaman bilong ls Nu Briten na Nesanel gavman long painimaut long wanem as tru na planti ol kokonas plantesen insait long Baining eria i wok long pundaun isi isi long prodaksen na nogat gutpela lukaut bilong ol.

"Insait hia long Baining eria em mipela i gat 20 plantesen we nau yet sampela bilong ol dispela plantesen i stap daunbilo long prodaksen level bilong produsim kopra bikos nogat gutpela menesmen na helpim i kam long ol narapela institutesen," Henry Kusak i tok.

Gazelle Lokol Level Gavman i bin kamapim dispela wok didiman i go insait long Lasul distrik bihain long luksave i kamap olsem planti ol kopra na kakau bilong ls Nu Briten provins i save kam long Baining i wok long go daun. Dispela em bikos long trenspot kos, ol sik i painim kokonas na kakau na tu nogat gutpela menesmen long lukautim ol dispela diwai. Trening menesa bilong CCI Malakai Tabar husat

i bin go pas long dispela wok didiman trening we i bin kamap long ples Munasawa insait long Lasul distrik i tok planti ol lain i bosim ol Kopra na Kakau plantesen nau i mas save long rot bilong lukautim gut na menesim ol diwai bilong ol.

"Pasin bilong prunim kakau, lukautim kakau long ol narapela sik na planim gutpela kwaliti kakau em nambawan samting ol menesa bilong plantesen i mas save gut long ronim gut ol plantesen," Malakai Tabar i tok.

Malakai tu i wokim wanpela nek i go long ol baining tu em long planim kakau na wok tu long planim ol narapela kaikai we i save gro gut long eria bilong ol. Baining em kol na i olsem Hailans bilong ls Nu Briten.

"Yupela i lukim long Gazelle em ol kokonas em bipo tru ol Jemeni i kam planim na nau dispela taim ol asples i bosim tasol na ol i no tingting moa long groim na planim moa kokonas bilong mekim kopra. Bikpela salens nau long ls Nu Briten em long kamapim rihebilitesen program we bai i lukim ol asples i planim bek kokonas bikos ol kokonas i stap nau em bilong bipo tru ol Jemeni i kam planim," Mista Tabar i tok.

Ol NARI tu i gat moa wok long mekim insait long Baining eria. Baining eria i gat bikpela sans long planim ol kain kain kaikai we i save gro long kol peles.

Mista Kusak i givim salens long ol didiman na NARI long helpim ol Not Baining long givim ol save long kamapim gut ol kaikai ol i save groim long hap.

Bisnis man singaut long rausim gan

Aloysius Laukai i raitim

BOGENVIL i mas rausim olgeta gan na ol nupela wok i ken kamap. Michael Huuma em papa na menesa bilong Jomik Treding em bikpela holsel na riteil stoa kampani long Buka i tok.

Mista Huuma i wokim dispela toktok bihain long ol stilman i bin wokim holap long sol wokman long stoa bilong em long Arawa na stilim K16,000 we stoa i bin wokim insait long wanpela de long las wik. Olsem wanpela bikpela holsel na riteil stoa long Bogenvil, Jomik Treding i gat ol

stoa long Buka, Kokopau, Arawa Buin na Siwai.

Mista Huuma i tok em i hat long wokim bisnis taim sampela lain i tagetim ol bisnismen husat i traime hat long kisim semis i go long ol pipel.

Long mun Me dispela yia, ol bin holim wanpela ka bilong em long haiwe namel long Arawa na Buka na stilim kesmani inap long K170,000.

Stil pasin ya i bin kamap long Mabiri taim ka i wok long go long Buka long benkim dispela mani. Wanpela beng tasol we olgeta pipel long Bogenvil i yusim long en em

long Buka Aitan. Long wankain taim, Mista Huuma i singaut nau long Otonomes Bogenvil Gavman (ABG) sapos em i ken sekim ol wok long kirapim beng long bikples Bogenvil.

Em i tok em i no seif long ol bisnis man i karim bikpela mani long longwe ples na longpela rot i go long Buka we beng i stap long en.

Em i tok strong olsem ol i mas pinisim wok long rausim olgeta gan long Bogenvil.

Em i tok Bogenvil i mas fri long ol gan na ol nupela wok go het i ken kamap.

SELEBREITIM 22 KRISMAS
WANTAIM LIKLIK DIPOSIT!
GUTPELA FRI GIFT, NA
WINIM BIKPELA KES MONI

DIPOSIT K1.00
PHILIPS 14PT2115/69R #101796
14" KALA TV
 • NTSC pilai bek • oto painim, storim na pasimaut wok
 • AV stereo and AV IN/AUT

DIPOSIT K1.00
PHILIPS 21PT2115/69R
21" KALA TV #103804
 • NTSC pilai bek • oto painim, storim na pasimaut wok • AV stereo and AV IN/AUT

DIPOSIT K1.00
PHILIPS FWV355 #202065
VCD MINI SISTEM
 • 1500W PMPO • 3 mini hiFi systems with 3 vcd changers • plays VCD, CD, CD-R & MP3 CDs discs
 Was Cash K1,795

DIPOSIT K1.00
PHILIPS #114869
DVD PLAYER DVP3000K/69
 • pilaim DVD, DVD-R, DVD-RW, VCD, SVCD, CD, MP3-CD, CD-R, CD-RW, piksa-CD (jpeg)

DIPOSIT K1.00
PHILIPS AZ2536
VCD CD/RCR #225825
 • save pilai MP3, CD-R/RW, COMPATIBLE CD, CD pilai, VIDEO CD pilai bek, wok KARAOKE

DIPOSIT K1.00
PHILIPS FWD576/21M #202957
DVD MINI SISTEM
 • 7500W PMPO • 3 dvd sanis • pilai DVD, DAVIX, (S)VCD, CD(RW) • dual logic teip dek wantaim oto ripilai • beis reflex spikas
 • klas 'D' digital amplifaia • 500W RMS, MP3-C, D, WMA-CD pilai bek,

DIPOSIT K1.00
PHILIPS FWD576/21M #202957
DVD MINI SISTEM
 • 7500W PMPO • 3 dvd sanis • pilai DVD, DAVIX, (S)VCD, CD(RW) • dual logic teip dek wantaim oto ripilai • beis reflex spikas
 • klas 'D' digital amplifaia • 500W RMS, MP3-C, D, WMA-CD pilai bek,

COURTS
Edim valu OLGETA dei!

COURTS - GORDONS
 Spring Garden Road, Gordons, Port Moresby
 Ph: 302 5800 • Fax: 325 4149 • E-mail: sales@courts.com.pg

COURTS - LAE
 Milfordhaven Road, Lae, Morobe Province
 Ph: 472 4800 • Fax: 472 4621 • E-mail: courts_lae@courts.com.pg

Olgeta Dro bai igat NIUELA Praiz long...

Dei bilong Dro: 1st Oktoba, 2005

NAU IGAT BIKPELA MOA LONG KES MONI YU INAP LONG WINIM K25,000.00

COURTS BONDEI LAKI DIP PRAIS
TAIM YU BAIM SAMTING LONG K50.00!

LUCKY DIP

Saus bilong yu lan WINIM:
 • yu let balen samting inap long K1,000.00
 • Diskout vaucha taim yu baim kago
 • Courts Shopin vaucha
 • slog beg na kep

Luteran sios bai makim 50 krismas insait long Papua Niugini

Veronica Hatutasi i raitim

EVANJELIKEL Luteran Sios long Papua Niugini (ELC/PNG) bai selebretim 50 yias bilong em olsem wanpela indipenden sios long kantri long Januери neks yia.

Dispela selebresen bai i kamap long Wasu long January 7 - 14, 2006 aninit long Het Tok, "Kristen i strongim bilip na mekim wok". Baibel Teks ol i kamapim dispela het tok i kam long en em, 1 John 3: 16-18.

Long dispela taim tu em i namba 25 sinod, em i olsem silva jubilee bilong bung

bilong sinod. Dispela em narapela samting bilong makim dispela selebresen.

Long dispela sinod namba 25 long January 7 i go 14 long Wasu, ileksen bilong Het Bisop, Deputi Bisop na Sios Sekretary bai i kamap.

Ukata distrik bilong ELCPNG bai hostim dispela sinod na selebresen.

Liklik histri em bihain long wok bilong ol misin long 1886 na i kam, ELC/PNG Sios of New Guinea (ELC/PNG) i bin kamap olsem wanpela sios em yet long long 1956.

Dispela tokaut i bin kamap long namba 1 sinod long Simbang em ples we namba wan Luteran misinari Rev.

Johann Flierl i bin kirapim wok long en. Long dispela taim long 1956 i bin i gat 3-pela distrik i kamap. Jabim, Kote na Madang. Ol arapela distrik i kamap bihain taim sios i wok long gro i kam inap tude.

Long 1970's ol i senisim nem Evangelical Lutheran Church of New Guinea (ELCONG) i go kamap Evangelical Lutheran Church of Papua New Guinea (ELCPNG) long wanem sios i gro bikpela na i go long olgeta hap bilong Papua New Guinea. Bai ol bikman bilong Luteran Sios long Gemeni, moa yet ol dispela i bin wok long PNG bai kam na stap insait long ol dispela selebresen.

Meri Hagen skul long Lae Yunitek lusim laip

Yawakicte Buafec i raitim

WANPELA meri Yunivesiti sumatin long Lae siti i lusim laip bilong em long han bilong ol birua man long las wiken.

Birua i bin kamap long las wik Sarere, Septemba long 1 kilok apinun ausait long Kamkumung maket bas stop.

Nem bilong meri i dai em Janneth Kerwa na em i bilong liklik ples Minup long Kumdi insait long Mul Distrik long Hagen, Westen Hailans provins.

Mis Kerwa i skul long Yunivesiti ov Teknoloji long Lae na em i bin gat tripela wik tasol long greduet wantaim Akauns Setifiket tasol birua i bungim em long las wik Sarere.

Ol polis long Lae i bin kari-maut wok painim long dispela birua na ol i holim pasim man nogut ya na lokim em long Lae opis sel wetim kot. Ol ripot i tok polis i tokaut long nem bilong

man i kilim dai sumatin meri olsem Michael Lai bilong Westen Hailans provins na em i tok em i man bilong dai meri ya.

Ol ripot i tok sumatin meri ya i bin kam long bas long Yunitek bilong go long taun na em bin senisim bas long Kamkumung maket taim man ya i lukim em na go long em, autim naip na sutim em long baksait we em bin dai long en.

Nau yet, ol famili bilong yang-pela meri ya i lusim Hagen na kam daun long Lae na wetim tasol ripot bilong ol polis na dokta na sasim dispela man.

Bodi bilong leit Janneth i slip i stap nau long Angaun Memoriei Haus sik.

Kain rabis pasin i bin pinis long sampela taim tasol nau i wok long kamap gen long Lae siti we i givim pret long ol manmeri long wokabaut.

Ol lain Morobe i no laikim kain pasin i kamap long siti bilong ol.

Gavman mas tingim ol rurel pipel

Janet Rowaro-DWU-sumatin i raitim

MOA long 5,000 pipel i bin pulap kapsait long Sen Peter Praimeri skul long Bogia Distrik long lukim mini kalsa so we ol skul sumatin i bin redim na putim kamap.

Sevenpela skul i karamapim Banara na Kabak praimer skul, Wanuru, Dugumer, Dalua, Banara na Atme Elementeri skul i bin stap insait long selebresen.

I bin gat gutpela taim bilong amamas wantaim ol kalsa singsing na danis, talen so na ol arapela samting moa ol bin putim kamap long ol pipel i lukim na amamas long en long dispela de.

Siaman bilong Indipenden Komiti i bin amamas tru long

dispela so bikos em i go gut, maski em i namba wan taim skul i kamapim dispela kain kalsa so.

Em i tok i gutpela long ol pikinini i stap insait long so na ol i ken lainim save long ol samting bilong kantri na kalsa.

Presiden bilong Almami Lokol Level Gavman Kaunsel Moses Oram i bin autim tok sori bilong em long i no helpim ol i ogenaisim dispela mini kalsa so we i bin kamap long taim bilong namba 30 indipenden aniveseri bilong PNG.

Mista Oram i bin tok em i no amamas long manimak bilong K10,000 we ol atoriti i bin katim i go long olgeta distrik bikos sampela distrik olsen Bogia i gat bikpela populesen moa.


Planti lain i amamas long dispela so.



WOK AWENES LONG WILWIL: Geseng Yatu na Jessie Maran em tupela yangpela bilong Morobe i hap long grup i bin kam long Mosbi long fan resing bilong karimaut HIV/AIDS aweanes. Toktok/poto: PAULUS TALI

Cat® 'C' Series Hydraulic Excavators

305C, 307C,
308C, 311C,
312C, 314C,
315C, 318C,
320C, 322C,
325C, 330C



Caterpillar® 'C' Series Hydraulic Excavators incorporates innovations for improved performance and versatility.

- **Engines and Hydraulics** - Cat® engines combine with proven hydraulics to give consistently high power and control in the field.
- **Structures** - Rugged Caterpillar® undercarriage design and proven structural manufacturing techniques assure outstanding durability in the toughest applications.
- **Operator Stations** - Operator work stations are quiet with ergonomic control placement and convenient adjustments, low lever and pedal effort, ergonomic seat design and highly efficient ventilation.
- **Serviceability** - Longer service intervals and easier maintenance results in better machine availability and lower owning and operating costs.

Hastings Deering



PORT MORESBY
Phone: 300 8300
Fax: 325 0141

LAE
Phone: 472 2355
Fax: 472 1477

TABUBIL
Phone: 548 9045
Fax: 548 9155

RABAUL
Phone: 982 1244
Fax: 982 1129

Ami balus stat karim kopi long bus ples long Hailans rijen

James Kila i raitim

ARAVA ami balus bilong PNG Difens Fos bai pundaun tude long Goroka ples balus long Isten Hailans provins tude long satim operesen bilong Grin Revolusen long Hailans rijen.

Wanpela singsing grup wantaim ol opisel bilong Kopi Industri Koporesen wantaim Isten Hailans Dipatmen ov Agrikalsa na Laipstok bai wetim ol long Goroka ples balus long givim welkam i go long ol dispela ol lain pailot na kru bilong PNG Difens Fos. Ol ami bai stap long Goroka long mekim ron bilong balus i go kam long ol ples balus long bus ples na karim kopi i go aut long maket.

Dispela ami balus i pinisim operesen long karim kopi long Oro na Milen Be provins long Sauten rijen bipo long em i muv i go antap long Hailans rijen.

Kopi Industri Koporesen (CIC) bai lukautim ol dispela lain ami long goroka na ol bai flai i go kam long ol liklik ples balus long bus long karim ol kopi i kam aut.

Dispela bikpela operesen bilong Arava ami balus bai karim ol kopi insait long planti ol liklik ples balus insait long Hailans rijen stat long Isten Hailans na Chimbu pastaim.

Sampela ol dispela ples balus dispela ami balus bai ron i go long karim ol kopi long en em Karamui, Marawaka,



TAIM BILONG KARIM KOPI: Dispela PNGDF Arava balus nau bai go insait long ol bus ples long Hailans rijen na karim kopi bilong ol manmeri i kam aut.

Simbari, Boiko, Noru na Negabo.

I gat ol narapela ples balus tu i stap em dispela balus bilong PNG Difens fos bai flai i go insait na karim ol kopi i go

aut long maket.

Dispela operesen Grin Revolusen bai helpim gut ol rurel pipel bringim planti handret tausen bek kopi i go aut long

maket. Dispela ol kopi bai helpim long bringim planti milien kina tru long helpim ikonomi bilong kantri.

Planti ol dispela kopi i ken bagarap na ol fama bai westim nating kain kes krop bilong ol, tasol Grin Revolusen em nesanel gavman wantaim Kopi Industri Koporesen (CIC) wantaim PNG Difens Fos em i gutpela tru long helpim ikonomi bilong kantri.

Dispela Arava balus bilong PNG Difens Fos i gat spes long karim wanpela tan kopi long wanpela ron bilong em.

Ripot i kam long Kopi Industri Koporesen Freit Suriti Kodineta, Samson Jack, i tok olsem planti namba bilong ol kopi bek i stap long planti ol ples insait long bus bilong Hailans rijen.

Planti ol dispela ples em nogat rot bilong kar na ol pipel i save yusim sevis bilong balus tasol. Nau yet pe bilong balus i go antap tru na dispela ron bilong ami balus em nesanel gavman wantaim CIC i kamapim i gutpela tru long givim sevis i go long ol rurel pipel long Papua Niugini.

Dispela wok bung wantaim namel long Kopi Industri Koporesen wantaim PNG Difens Fos em bikpela samting tru insait long kirapim bek rurel industri insait long PNG.

Long planti rot dispela wok bilong Grin Revolusen i givim strong long ol rurel komyuniti insait long kantri long kamap olsem wankain patna insait long developmen bilong Papua Niugini.

Goroka So komiti givim TV na DVD long ol Bihute kalabus banis

OL LAIN kalabus bilong Bihute banis kalabus insait long Isten Hailans provins nau bai i gat sans long lukim ol piksa insait long banis bilong ol bihain long ol i kisim ol nupela TV skrin na wanpela masin bilong pilaim ol DVD piksa.

Dispela i bin kamap bihain long gutpela wok ol lain kalabus i bin mekim long helpim long wokim ol stol na stretim ol samting long kamapim 2005 Goroka Kalsarel So long dispela yia.

Long Tunde dispela wik pres-

iden bilong Goroka Kalsarel So Sosaiti, Himony Lapiso wantaim presiden bilong Goroka Semba ov Komes na Industri, Terry Shelley i bin go antap long Bihute haus kalabus na givim wanpela TV skrin na dispela DVD pilaim long ol lain kalabusman.

Goroka Semba ov Komes na Industri i bin tekova long ronim Goroka So long dispela yia. Dispela bikpela selebresin i bin pulim planti manmeri tru na ol turis bilong ovasis husat i bin kamap long lukim moa long 60-pela singsing grup i givim sam-

sam stret long Nesanel Spots Institiut So graun.

Mista Lapiso i tok olsem dispela helpim ol lain kalabusman bilong Bihute i givim i mekim wok bilong so komiti i ron gut tru. Maski olsem ol i bin gat sotpela taim ol i kamapim gutpela festival tru long dispela yia we planti ol lain turis bilong ovasis i amamas tru.

Komanda bilong CIS Bihute haus-kalabus, Charles A'au i givim bikpela tok tenkyu bilong em i go long Goroka So Komiti wantaim Goroka Semba ov Komes na Industri long dispela

luksave bilong ol long ol lain kalabusman bilong em.

Mista A'au i tok olsem nau yet insait long nupela rifom bilong CIS, dipatmen i wok long larim ol lain kalabusman husat i nogat poret tumas long komyuniti long go aut na mekim ol wok insait long komyuniti.

Mista Shelley i tokaut tu olsem Goroka Semba ov Komes na Industri i amamas long wok klostu wantaim ol lain CIS bilong Bihute long yusim ol lain kalabusman long mekim ol

komyuniti wok insait long Goroka taun.

Em i tokaut tu olsem narapela wok ol lain semba i tingting long yusim ol lain kalabusman em long klinim pablik ples matmat bilong Goroka na tu long klinim na planim flaua arere long Goroka ples balus.

Mista Lapiso i tokaut olsem ol bai kisim wanpela DVD long givim i go tu long ol kalabusmeri long Bihute kalabus banis na ol tu bai gat sans long lukim ol piksa insait long banis bilong ol.





YAMAHA

KEROSENE

Outboard Motor

CLEARANCE OFFER

AVAILABLE FOR IMMEDIATE DELIVERY NATIONWIDE

EK40JMHL

- 40hp, 2 Stroke
- Kerosene driven Out board Motor
- Low Fuel Consumption
- Parts & Service backup

SPECIAL PRICE

K8,299

Price Includes GST

Ela Motors

Offer Expires: 31 / 10 / 2005 or While Stocks Last!

Port Moresby... Ph 3229400 Kokopo... Ph 9829100 Kimbe... Ph 9835155 Buka.....Ph 9835155 Wewak....Ph 8562255 Tabubil....Ph 5489060
 Lae Ph 4781800 Kavieng.. Ph 9842788 Lihir.... Ph 9864099 Vanimo...Ph 9864099 Madang.. Ph 8522188 Alotau....Ph 6410100

Oro laik rausim ol Setelmen

OL-SKWATA setelmen insait long kantri i as long planti hevi long ol eben eria na planti maski planti toktok i kamap long rausim ol, ol i sanap strong i stap.

Sampela provins olsem Madang i bin go hetim ol plen bilong ol long rausim ol skwata

lain long yia bipo na las yia.

Nau, Oro Provinse Gavman i laik rausim ol setelmen insait long ol eben eria na taun bilong em.

Oro Provinse Gavman i kamapim wanpela Task Fos pinis long rausim ol skwata setelmen insait long

Oro provins husat i sindaun long graun bilong gavman, praivet sekta na tu, rausim ol ritrens pablik sevan long provins i stap long ol gavman haus..

Deputi Gavana MaLaren Komoda i tok ol i putim ol lain Oro na i no bilong Oro i go

insait long dispela komiti.

Em i tok dispela Task Fos komiti bai tokim ol ritrens pablik sevan long lusim ol haus ol i stap long en.

Em i tok ol ritrens pablik sevan lain ya i wok long stopim ol nupela woklain husat i laik go long Oro long

helpim wantaim ol wok go het long provins.

Mista Komoda i tok Task Fos bai rausim tu ol setelmen, maski ol pipel yet bilong Oro o arapela provins i stap long en. Em i tok planti lo na oda na ol arapela trabel i kamap long ol setelmen na ol skwata long ol gavmsan haus

na ol i stopim wok go het long provins.

Long wankain taim, Mista Komoda i tok ol i surukim vot i nogat bilip ol i laik mekim long tripela Palamen Memba bilong Oro. i go long neks wik Fraide, Oktoba 4.

Oi i surukim dispela vot bikos ol Presiden bilong ol Loko! Level Gavman Kaunsel husat i bin kamapim dispela vot i no bin stap.

Oi LLG presiden i laik karimaut dispela vot bikos ol i no stap long provins na ol i save go tasol long kisim ilektorel fan mani na go bek wantaim dispela mani i go bek long Mosbi.

Tripela Palamen memba bilong ol em Gavana Bani Hoivo, Sohe memba Peter Oresi na memba bilong Ijivitari Cecil King.

Sentrel Etministreta i no wanbel

SENTREL Provins Etministresen i no wanbel long singaut we Presiden bilong Papua Niugini Fores Industri Asosiesen (PNGFIAS) i wokim long rausim lainsens bilong wanpela timba kampani i karimaut wok long provins.

Etministrera Raphael Yibmaramba long dispela wik i tok nogat long dispela singaut na i tok kampani Nasyi Namba 98 Limitit i wok aninit long lo bilong kantri na em i no hap bilong Kerewara Timba kampani bilong ol Saina o Malesia olsem Presiden bilong PNGFIAS i tok.

Mista Yibmaramba i wokim dispela toktok bihainim ol ripot i bin kamap long nius long dispela wik na i tok PNGFIAS i mas noken go insait long wok bilong Sentrel Provinse Gavman i kisim dispela kampani bikos em i bihainim plen bilong Nesene Gavman long Grin Revolusen na Ikonomi o wok mani i kisim strong long salim ol samting i go aut.

Em i tok dispela em i namba wan kain projek olsem long agro-forestri we ol i planim welpam long olgeta 200 hekta eria ol i katim diwai long en.

"Dispela i stat pinis bihain long ol bin kisim 2000 pikinini bilong welpam diwai i kam long Oro long dispela wik. Bai ol i kisim sampela moa pikinini diwai i kam long Wes Nu Briten, Nu Ailan na Milen Be.

"Mipela i askim nau Presiden bilong PNGFIAS Mista Bai o ol hauslain bilong em long tokaut long intres bilong ol long kampani we i wok klostu long dispela projek. I moabeta long Mista Bai i wari long loging o katim timba i wok long kamap long Nakanai eria insait long Wes Nu Briten we i kamapim planti bagarap na i kamap klostu long nus bilong em. Tasol em i noken go insait long samting bilong Sentrel provins," Etministreta i tok.

Lamana bai holim pikinini talen so ...Sapotim long gutpela wok

LAMANA Gol Klab insait long Nesene Kapitel Distrik bai lukim planti naispela liklik Prinses taim ol i bung long hap long selebretim Prinses bilong Wol Talen So De long tunait.

Olgeta mani ol i resim bai go long PNG Children's Foundation.

Eitpela liklik meri krismas bilong ol i stap namel long 8 na 12 na i kam long olgeta kantri long wol bai lukim ol dispela pikinini i putim kamap ol singsing, danis bilong resim mani bilong Sariti.

Nem bilong ol liklik Prinses em Jeanette Diaka i sanap olsem Mis Amazon Realty, Forja Fox em Mis Ingran, June English em Mis Motu Koitabu, Emma Orea em Mis Konsi Limitit, Patricia Fox em Mis Tatana, Harshita Varsney em Mis India, Thelma Sigalhairi em Mis Bogenvil na Angelica Faye Marqueses em Mis Filipino.

Sapos yu laik lukim gutpela so na tromoim mani bilong yu long sapotim gutpela wok, yu ken kisim ol pikinini na famili i go long Lamana Gol Klab. Yu ken baim K20 tiket long Lamana Hotel risepsen.

Tingim, mani we dispela so i resim bai go long helpim ol pikinini bilong dispela kantri.

SEALARK

Lae - Port Moresby - Lae

- **Adult one way single fares starting from K200.00**
- **Huge Discount for children, students and groups.**

COMING SOON!

Planti ples long Goilala nogat sevis

Veronica Hatutasi i raitim

SINGAUT i go long ol Palamen memba na lida bilong Goilala Distrik long kisim ol sevis olsem helt, edukesen na rot i go long ol pipel i stap long ol ples i stap longwe long maunten na bus.

Long wankain taim tu, singaut i go long ol pipel long PNG i mas gat rispek long ol yet, ol narapela na kantri.

Jacinta Kodana em wangepela meri lida long Goilala distrik long Goilala Distrik na i bin wok wantaim ol meri grup long Nesenel Kapitel na Sentrel provins i wokim dispela singaut.

Misis Kodana husat i gat 66 krismas na i kam long ples Baula long Dilava Sensus Divisen long boda bilong Mekeo na Fuyuge, em i mama bilong namba wan meri jas long PNG, Jas Cathy Davani.

Em bin wok long planti yia wantaim ol Pot Mosbi Daiosis Katolik Wimen's Asosiesen we em bin presiden long 1978.

Na long 1982, em bin presiden bilong Sentrel Provinsel Wimens grup. Em bin lusim wok ya long 1999 bikos em i gat sik wantaim lek solap.


Misis Kodana i winim moa long 30 krismas long stap long Mosbi siti. Wok bilong em i bin sut long sapatim ol meri, famili na famili na lukim olsem ol i go fowet na tu kisim sevis na go insait long wok developmen.

Bikpela wari bilong em nau em planti mama na pikinini na pipel i dai na bungim hevi bikos i nogat helt na edukesen sevis na rot i go long ol ples insait long Goilala Distrik.

Misis Kodana i tok i moabeta long ol palamen memba bilong Goilala i beis long ples we bai ol i save long wari na hevi na ol samting ol pipel i laikim na helpim ol.

"Dilava sensus divisen we viles Baula i wangepela long en, i gat 8-pela viles na i nogat skul o helt sevis i stap klostu. I nogat rot i go kam long ol ples. Liklik bus rot tasol i stap. Planti mama i karim pikinini na i dai.

Planti pikinini na ol narapela manmeri i sik i save dai tasol. Nogat helt senta i stap klostu. Fane Misin stesen we i kisim wangepela nait long wokabaut i go na skul tu we misin i save ranim i pas pinis long sampela yia nau.



MISIS KODANA: Ol yangpela i mas gat gutpela sindaun long bihain taim. Em i gat bikpela wari long ol pipel i no save kisim sevis.

Gavman i bin tekova na nau, ol i no moa wok.

"Ol atoriti i mas sanapim skul na putim etpos o helt senta long Dilava sensus Divisen," Misis Kodana i tok.

"Mi wari tru long ol pipel insait long ol ples longwe husat i no kisim sevis. I moabeta long ol Goilala memba i lukluk long kra i hevi bilong ol pipel na wokim samting. Taim bilong kempein, ol i save go na Iromoi ol gris toktok. I kam inap nau, ol pipel i wet long kisim gutpela sevis na planti mama,

pikinini na pipel i wok long dai. Planti yangpela tu i nogat save long rit na rait na ol i painim sevis na kam long siti na wokim ol kain trabel.

I moabeta long Goilala memba i go bek long ples, kirapim opis na sindaun long hap na harim wari bilong ol pipel na helpim ol," Misis Kodana i tok.

Long wankain taim tu, Misis Kodana i tok yumi pipel yet i mas senisim pasin na lukautim Pot Mosbi siti bai kamap klin na naispela na seif ples long stap long em. Na ol turis na ol arapela ausait lain i amamas long lukim.

Raun lukim ol meri na pikinini

Ol piksa bilong Caritas Gels Teknokel Sekonderi Skul Fasen So. Ol sumatin i kisim Fasen na Disain kos i somapim ol kain klos ol yet na modolim ol long Fasen so bilong ol las Fraide. Planti papamama na ol ges ol invaitim i bin amamas wantaim klostu 600 sumatin meri long lukim ol kain stail naispela klos ol sumatin yet i somapim na modolim long ol.



DRIMAN BILONG OLGETA YANGPELA MERI: Luk stail stret em Nadia Parascos na Florence Maeana i modol long weding klos bilong marit. Sister Mazzarello Choi CSM em tisa bilong ol husat i bin wokim beten bilong marit klos. Kain weding klos em olgeta yangpela gel i laik marit i save driman long putim long spesel de bilong em.



STAIL BILONG PNG KALA: Olita Loi em gret 10 sumatin i luk nais tru wantaim evening dres o klos bilong werim long ol bikpela pati, em bin modol long em long Caritas Fasen So.



LIKLIK ANGELO: Liklik Yara Tuguinay i modol wantaim naispela klos long Evening wear seksen.



OL NAISPELA LAIN TRU: Yu ting em ol Mis PNG Kwin resis lain tasol nogat, Ol Fasen na Disain sumatin bilong Caritas i stailim tru long Fasen So bilong ol.

Lo bilong Lukautim ol Meri na pikinini



Skrum tok long Mentenens
MENTENS oda em i no oda bilong pinisim marit.

Husat i ken aplai long mentenens oda?

- Sapos yu marit na man bilong yu i ronawe na i no mao givim mani long yu, yu ken aplai long mentenens oda bilong yu yet na bilong pikinini tu, sapos man i nogat gutpela risen long lusim yu. Maski yu gat wok, yu ken aplai long mentenens bilong yu yet, na bilong ol pikinini tu. (Seksen 1 Deserted Wives and Children Ekt o Lo i karamapim ol meri na pikinini man i lusim ol)

- Sapos yu marit na yu lusim man bilong yu bikos man yet i save mekim nogut long yu, o sapos em i rausim yu nating, yu ken aplai long mentenens oda bilong yu yet na bilong ol pikinini tu.

Moa long neks wik.

Sotpela Tok Lukaut

Skrum HIV/AIDS toktok

SAPOS yu gat poroman i gat binatang bilong AIDS, yu inap sapatim na wokim gut long em. Yu ken lainim long pren bilong yu. Wok pren bilong yupela i ken go het.

Yu ken helpim tu pren bilong yu long stap gut i go long planti krismas moa. Yu ken bungim pren long ples we yupela i ken dringim ti o jus na i no alkohol. Yupela i ken go long ol danis na pilai na ol arapela samting moa wantaim.



Kuk Kona
wantaim
MERI WANTOK

Tia Maria Kakaruk

Yu mas i Gat:
1 kg kakaruk
60 kilogrem bata
haf kap krim

Marinet:

E na kwata kap wara
1 kakarik stok kiub
3 tebolspun Tia Maria
2 tebolspun konflaua

We long Kukim:

- 1-Praim kakaruk isi long bata.
- 2-Putim ol hap hap kakaruk long Sesen Sev kontena o dis
- 3-Kombainim o putim wantaim ol samting we yu marinetim pinis i go insait long dis o kontena na miksim ol gut gen.
- 4- Kapsaitim i go antap long kakaruk na tanim gut. Wokim dispela long tupeia awa.

STORI TASOL



wantaim

FR. PAUL LIWUN, SVD

Save gut long stail bilong meri

WANPELA pikinini meri bilong susa bilong mi, em olgeta taim em i was was pinis na putim klos, komim gras na bilasim pes bilong em pinis, em i save kam long mi na askim mi long Bahasa Indonesia; "Om, saya cantik atau tidak?" (Ankol, mi smat o nogat?).

Mi save bekim, yu smat tru ya. Planti manki bai ai gris long yu nau. Em i smail na amamas tru long dispela bekim bilong mi.

Em i wanpela hap insait long laip bilong ol yangpela meri, taim ol i kamap long sampela krismas bilong ol, ol i save tingting long mekin kain kain samting long mekim ol i luk smat. Na ol i save askim ol narapela manmeri long tokim ol sapos ol i smat pinis o nogat. Taim yumi tokim ol olsem ol i smat pinis, ol bai kisim strong long ol yet. Long dispela we tu bai helpim ol long luksave long ol yet.

Stori bilong mi tude bilong helpim olgeta meri na yumi tu, long luksave, wanem samting i mekim ol meri i kamap smat (cantik - tokples bahasa Indonesia) long laip bilong ol. Tasol em i no stori nating, em i olsem wanpela stret-pela rot o stia long mekim yu kamap smatpela (beautiful) meri long laip bilong yu.

Sapos yu laik mekim maus (lips) bilong yu kamap smat na luk nais, yu mas toktok long ol gutpela samting tasol. Na long mekim ai bilong yu i kamap naispela, painim na lainim gutpela samting i save stap wantaim olgeta manmeri yu bungim long laip bilong yu.

Long mekim bodi bilong yu i kamap slim na luk smat, skelim kaikai bilong yu wantaim ol manmeri i kraik long hangre. Long mekim gras bilong yu i kamap gut na luk nais, askim wanpela liklik pikinini long komim gras bilong yu wantaim pinga bilong em olgeta de. Na sapos yu laik mekim bodi bilong yu i luk nais, wok-abaut wantaim ol save bilong yu na long dispela wei, yu bai i no inap pilim olsem yu wan-pis tasol i wokabaut long rot.

Tingim, long dispela graun, manmeri i winim olgeta narapela samting God i bin wokim na putim wantaim yu. Yu nidim senis long kamap nupela na gutpela. Yu nidim ol narapela manmeri long mekim yu kamap nupela gen na olgeta taim yu nidim pasin bilong bel isi, yu mas pogivim ol bai ol i pogivim yu. Olsem na noken daunim ol narapela manmeri, nogat. Yu mas mekim gut long ol olgeta taim, maski ol i nogat namba insait long komyuniti. Sapos yu bin wokim ol dispela gutpela samting long ol, noken lusim tingting. Tingim oltaim. Bikos gutpela taim yu bai bungim bihain. Em i kamap long taim yu bungim hevi na nidim helpim. Maski yu no askim ol, tasol taim hevi i kamap long laip bilong yu, i gat planti han bai givim helpim long yu. Taim krismas bilong yu i kamap bikpela na yu kamap lapun isi isi, yu mas amamas na tok tekyu olgeta taim long God, bikos em i bin givim yu tupela han. Wanpela han bilong helpim yu yet, na narapela han bilong helpim ol narapela manmeri.

Naispela klos wanpela meri i werim (putim) em i no mekim dispela meri i kamap smat (beautiful). Bodi na gras bilong meri tu i no mekim em i kamap smat. Smat (stail) bilong meri i stap long ai bilong em, olsem wanem em i lukim dispela wol. Bikos insait long ai bilong em i gat bikpela dua i go insait long lewa o bel bilong olgeta manmeri, na insait long bel bilong olgeta manmeri, laik pasin i save kamap na grow.

Stail bilong meri i no stap long naispela pes bilong em. Nogat. Trupela smat bilong meri i stap insait long bel bilong em. Trupela Laik pasin na bel isi i save kamaut long trupela smat long bel bilong em. Na dispela smat insait long bel bilong em i no save pinis.

Nesenel rali bilong ol Katolik mama kamap long Goroka

James Kila i raitim

MOA long 5000 mama bilong Katolik Sios insait long Papua Niugini husat i kam long planti liklik ol daiosis insait long kantri i bung nau long Goroka, Isten Hailans provins long PNG Katolik Wimens Felosip Nesenel Rali.

Bikpela toktok bilong dispela rali o bung em "United in Faith With Action, Alive with Christ" Long tok-pisin dispela i min olsem "Yumi sanap wantaim long Bilip na Mekim Wok, na Stap Laip insait long Kraik"

Nambawan misa bilong ol dispela rali i bin kamap long Sande wantaim lotu em Bisop bilong Goroka, Bisop Francesco Sarego i go pas long en. Ol tok welkam i bin kam long Katolik Wimens Federesen bilong Hailans rijen Maggie Turuwai, Presiden bilong Katolik Bisop Konferens na Bisop bilong Goroka daiosis, Francesco Sarego.

Man husat i bin opim rali em bisop bilong Mendi daiosis, Bisop Stephen Reichert.

Long Mande moning ol dispela mama bilong PNG i mas raunim Goroka taun long soim bung wantaim bilong ol long tok agensim dispela pasin nogut we i save bagarapim sindaun bilong ol mama na



MAS LONG WES GOROKA: Ol mama i mas ong Wes Goroka long Nesenel Rali bilong ol Katolik mama long Goroka.

pikinini insait long kantri. Dispela mas bilong ol i bin stat long Wes Goroka we i lukim ol mama husat i kam long ol narapela provins i werim ol kala klos na mas wantaim flek bilong ol. Wanpela plis ka bilong Goroka i bin go pas long dispela mas bilong ol.

Planti ol narapela program i bin kamap long Mande we i lukim planti ol gutpela toktok i kamap long strongim wok bilong ol Katolik mama insait long kantri long karimaut gutpela wok insait long sios na

famili long bringim gutpela sindaun insait long komyuniti.

Insait long program bilong ol, i bin gat planti ol gutpela het-tok i stap we ol mama i askim ol saveman long skulim ol long gutpela pasin ol mama i ken mekim.

Progrem bilong Tunde i lukim ol mama i stat wantaim lotu em Vika Jenerel bilong Goroka daiosis, Pater Darius i go pas long en. Bihain long dispela Pater Franko bilong Melanesian Institiut i givim tok-

tok long wok ol mama i mas mekim insait long sios tude.

Narapela man husat i givim toktok tu em Dairekta bilong Karitas PNG Tas Maketu husat i toktok long wok bilong ol mama insait long sios na komyuniti tude.

Narapela spika husat i givim toktok long Tunde tu em William Kot, husat i givim tok-tok long sait bilong edukesen na bung wantaim bilong ol man na meri long sait bilong edukesen.



SKUL MINISTA: Mama Moetaua na man bilong em Ina bai pinisim skul long dispela yia.

Meri minista helpim yut na komyuniti

Veronica Hatutasi i raitim

KISIM Kristen mesej i go long ol yangpela pipel na komyuniti long painim Jisas em wanpela bikpela samting we wanpela meri i skul minista long Kuk Ailans bai mekim taim em i pinisim skul bilong em long dispela yia.

Long wankain taim tu, go insait long dispela skul i senisim laip bilong em.

Mama Moetaua i gat 34 krismas bilong Mauke Ailan insait long Kuk Ailans grup i maritim Ina na tupela wantaim i wokim namba 4 na fainol yia bilong ol long Takamoa Tiolojikel Koles long Avarua, Rarotonga long Kuk Ailans.

Tupela i gat tripela pikinini na ol i stap wantaim long kolis. Kuk Ailans Kristen Sios (CICC) i papa long dispela kolis we i wanpela olupela kolis tru insait long Saut Pasifik rijen.

Ol bin kirapim kolis long 1839 na wantaim 166 krismas, em i namba tu olupela kolis long Pasifik bihainim wanpela long Tahiti. CICC Sios em ol i bungim wantaim Metodis na London Misinari Sosaiti Sios long 1965 na kolim dispela nem, olsem Yunaitet Sios insait long PNG. Em bin kam pastaim long Kuk Ailan na planti pipel long dispela ailan kantri i mamba bilong CICC.

Wantok niuspepa i bin bungim Mama Moetaua long Wol Asosiesen bilong Kristen komyunikesen (WACC-PAC) Pasifik rijen bung i bin

kamapim long Rarotonga tupela wik i go pinis. Kolis i gat 24 sumatin we 12-pela famili i wokim 4-pela yia skul Tioloji long em. Na dispela em i laspela yia bilong ol.

Kolis i kisim ol sumatin namei long 18 na 35 krismas na ol sumatin i skul i stap em ol yangpela papamama namei long dispela krismas mak.

Skul graun i no bikpela eria tumas tasol em i gat ol samting we ol sumatin i skul gut long em olsem klasrum na ples bilong slip bilding, laibreri, ol kompyuta, komyunikesen dipatmen, printing seksen, konferens eria na ol arapela moa.

Ol naispela purpur i raunim kolis na hap eria em i stap long en i kwait na givim gutpela sans long ol sumatin i skul long em.

"Mi bihainim singaut bilong man bilong mi na mi kam long Takamoa long yia 2002. Mi kisim nupela laip na mi gat hop long futja wantaim Jisas olsem pesenel Sevia bilong mi. Bipo bilip bilong mi i no bin strong.

"Nau tu, long 4-pela yia skul long Takamoa, mi bilip olsem dispela i helpim gro long spirituel sait na ol skul long Buk Baibel we mi klia gut long en bikos Biblikel Stadis em wanpela kos eria mi kisim.

Mi stadi long ol erja olsem Tioloji, Hibru, Grik, Biblikel Stadi na ol arapela moa.

"Mi lainim planti samting we i skruim save long helpim famili, ol meri na komyuniti long en long Takamoa.

THE BIBLE SOCIETY
PAPA NEW GUINEA

YUMI NO KEN MEKIM OL BRATA I PUNDAUN NA MEKIM SIN

Olsem na yumi mas lusim pasin bilong skellim pasin bilong ol arapela brata na tingting nogut long ol. Yumi mas bihainim narapela tingting, em long yumi no ken mekim wanpela samting bilong mekim brata i pundaun na mekim sin. Bikpela Jisas i bin mekim tingting bilong mi i klia, na mi save gut olsem, i no gat wanpela samting em yet i doti long ai bilong God. Tasol sapos man i ting wanpela samting i doti, orait long laip bilong dispela man dispela samting i stap doti tru. Olsem na sapos yu kaikai wanpela samting brata bilong yu i ting em i doti long ai bilong God, na long dispela pasin yu bagarapim tingting bilong dispela brata, orait yu ken save, long dispela pasin yu no givim bel bilong yu long brata. Kraik i dai pinis bilong kisim bek dispela brata, na yu no ken larim kaikai bilong yu i bagarapim em. Sapos yupela i ting wanpela samting em i gutpela, orait yupela i mas lukaut, nogut pasin bilong yupela yet i mekim na ol arapela man i tok dispela samting i nogut. Kingdom bilong God i no pas long kaikai na dring. Nogat. Pasin tru bilong kingdom bilong God em i stretpela pasin na bel isi i pasin bilong amamas Holl Spirit i save kamapim. Man i bihainim dispela pasin na i mekim wok bilong Kraik, bai God i laikim pasin bilong em, na bai ol man i tok amamas long em.

ROMAN 14:13-18

GLASIM TOK



wantaim

BISOP PETER FOX

Wanem samting i wokim kristen marit?

LAS wik, ol kleji bilong Anglikan sios na ol famili bilong ol i bin stap insait long wanpela ritrit. Ol bin laik gat taim long bung wantaim, lusim bisi na ol wok bilong peris laip long gat taim bilong stap isi na tingting gut na beten.

Em i namba wan taim ol famili bilong ol kleji i bin stap long anuel ritrit bilong ol. Bikpela samting we mipela i bin tingim na pre long en em long famili laip bihainim ministri.

Reveren Herman Spengler bilong Melanisen Institut i bin givim wanpela gutpela toktok tru long rot we tredisenel marit long PNG i wok long bungim hevi long ol presa bilong eben laip o laip long taun na sifi.

Planti taim, mipela i painim mipela yet i askim; wanem em Kristen marit? Marit we i stat wantaim sios sevis i ken sot long kamap trupela Kristen marit sapos man na meri i no luksave long wanpela narapela long Kristen pasin.

Sapos man i paitim meri bilong em, sapos ol papamama i no wokim gut long ol pikinini, olsem wanem ol bai kolim marit bilong ol i wanpela Kristen marit?

Sapos man na meri i paul nabaut, slip nabaut wantaim ol manmeri ol i no marit long ol, ol i no wokim gut long ol patna bilong ol, famili na God.

Trupela tes bilong Kristen marit em rot we man na meri i wokim gut o no gutpela long wanpela arapela. Em i no kamap long wanpela de bilong preia long sios, tasol long laip taim rot bilong Kristen i laikim wanpela narapela na wankain lukaut.

I gat planti rot long statim marit long PNG. Yumi i ken marit long tumbuna pasin, makim marit na senisim presen o marit long sios. Go na stap wantaim na tok dispela em marit i no trupela marit. Em i no stap long pasin tumbuna bilong PNG o Kristen marit.

Trupela marit i stat wantaim promis olsem tupela bai i stap pas long wanpela narapela na dispela i gro taim ol i no brukim promis olgeta de.

Marit long pasin kastom i no bilong tupela pipe i slip wantaim wanpela arapela tasol, nogat, em i bilong yunaitim tupela famili na lukautim ol pikinini.

Marit long kastom pasin long PNG i ken Kristen marit tu sapos tupela marit i stap pas long wanpela narapela na ol i no wokim bikhet pasin., ol i laikim wanpela arapela na ol i lukautim gut ol pikinini na lainim ol long wei bilong God long toktok na pasin. Blesing bilong God i no stap tasol long preia we pater i wokim, tasol long luksave na onaim nem bilong em olgeta de long rot we yumi bihainim long stap wantaim.


OL Katolik Bisop agensim nupela palamen lo

... Askim pablik long egensim strong

KATOLIK Sios long PNG i egensim lo we Palamen i laik kamapim long i no rausim ol Palamen memba i wokim asua na em i askim ol sios memba na ol arapela i laikim gutpela pasin long agensim dispela.

Presiden bilong ol Katolik Bisop long PNG na Solomon Ailan Bisop Francesco Sarego i makim maus bilong ol bisop na tok kantri we i larim ol bikman i abrusim lo taim ol i wokim rong i lukautim pipel i wokabaut bihainim graun we birua bai kamap long en.

"Mipela i singaut long ol Katolik na ol arapela pipel i laikim gutpela pasin long tokaut long dispela taim na tokim ol lida bilong dispela kantri we ol (pipel) yet i makim ol olsem ol i no ken traim long abrusim lo taim ol i asua na bagarapim luksave ol pipel bilong dispela kantri i givim long ol.



AGENSIM: Bisop Francesco Sarego

"Long dispela taim, ol lida i save lusim wok taim lo i painim ol olsem ol i asua long stilim pablik mani. Man i holim bikpela wok i wokman bilong ol pipel husat i stap olsem bos.

"Em i krangi long tok olsem bos i no inap long rausim wokman i wokim stil pasin na em i asua. Tasol dispela em nupela

lo ol i toktok long em bai kamapim," Bisop Francesco i tok.

Em i tok sampela lida em lo i painim ol olsem ol i asua long bagarapim luksave pipel long kantri i givim ol tasol hamas taim yumi lukim ol i abrusim mekim save?

"Sampela kain trik i save mekim ol i abrusim mekim save. Ol i save risain long wok bilong ol na tru, ol i mas risain, tasol long dispela rot, ol i abrusim mekimsave. Wanpela hap bilong jastis em mekim-save. Taim ol Palamen memba i wokim trik na abrusim mekim-save, komyuniti i karim hevi. Komyuniti i mas gat bilip long pablik sistem," Bisop Francesco i tok.

Em i tok planti taim, pablik i save lukim ol lida na palamen memba i yusim krangi posisen bilong ol olsem em i rait bilong ol.

"Yumi save lukim ol politisen i holim ol bikpela bandel kes na dispela em mani bilong ol pipel bilong dispela kantri. Long ol strit tu, ol i fosim ol pipel long muv i go long sait bikos ol sevan i no laik bai lo we i karamapim ol narapela i karamapim ol. Ol ka i lain na go pairapim ol sairen, lait i on na ol i ron na ol i ron spit tru na dispela i mekim klia olsem ol i antap long lo. Planti moa piksa i stap," Bisop Francesco i tok.

"Taim wanpela man nating i go aninit long jastis sistem, em i ken les bikos ol i no hariap. Ol Palamen memba i kam aninit long dispela sistem bikos ol i wokim rong i save les tru tu long wet longpela taim long lo i glasim na skelim ol samting. Ol trupela lida, i luksave long ol pipel bilong ol, inap lukluk long ol rot bilong kamapim gut ol samting na i no long mekim ol to tasol," Bisop Francesco i tok.

Amet singautim ol lida long wok bung

Elias Darius-DWU- i raitim

PASTAIM Sief Jastis Sir Arnold Amet i singautim ol lida long Madang long yunait aninit long Kristen bilip na ranim provins.

Sir Arnold i wokim toktok long selebren bilong kamap long ol namba wan Rhenis Misinari bilong Gemeni long Madang moa long 118 krismas i go pinis.

Tupela Evanjelikel Luteran Sios distrik em long Madang na Karkar i bin holim ol selebren long ples on insait long Bongu Seket.

Sir Arnold i bin tokim ol pipel olsem i no wok bung wantaim em i as long planti hevi long politiks, pablik sevis na olgeta eria long komyuniti na sosaiti.

Sir Arnold i tok long gat gutpela sindaun na ol samting i go gut, pipel i mas tanim bel na kisim Jisas olsem Sevia bilong ol.

Em bin salensim ol politisen bilong Madang na ol pipel long yunait aninit long bilip long Jisas na kamap wanpela long spirituel sait na provins i ken ron gut.

Long nau, sir Arnold i wok klostu wantaim Het Bisop bilong ELC/PNG Dokta Wesley Kigasung long strongim gro bilong sios na dispela em long olgeta sios distrik na

rijen long kantri long go insait long wok bilong sapatim sios.

Em i go pas long karimaut Kristen lidasip trening i go long-ol sios lida, gavman na non gavman ogenaisesen.

"Olgeta lida, maski wanem eria yu wok long en, i mas kamap wok manmeri bilong pipel long kantri i go het," Sir Arnold i tok.

Long wankain taim, ol pipel bilong Bongu Seket i singaut long Madang Provinsel gavman na ol Lokol Level Gavman bilong helpim long ol kain wok olsem long futja.

Wanpela lida bilong ples husat i no laik tokaut long nem bilong em i tok ol yet i bin bungim mani na peim olgeta samting long holim dispela selebren.

Em i tok dispela kain samting i wok long kilim intres o laik bilong ol pipel na long wankain taim tu, sampela pipel bai i no inap givim luksave long ol lida bilong ol.

Kigasung singautim ol pipel long wok bung

Alias Darius- DWU-i raitim

HET Bisop bilong Evanjelikel Luteran Sios long PNG Dokta Wesley Kigasung i singautim Madang Provinsel Gavman na ol pipel long yunait na wok wantaim long kamapim gut provins.

Em bin wokim dispela toktok long moa long 5,000 pipel bilong Madang na Karkar ELC/PNG husat i bin bung long i bin holim bikpela selebren las wiken bilong luksave long kamap bilong namba wan misinari Rhenis misinari 118 krismas i go pinis.

Ol sios lida bilong tupela ELC/PNG Seket i bin go pas long wok bilong redim na strongim ol pipel long bungim mani ol yet bilong selebren.


Dokta Kigasung i bin tok Madang i gat gutpela histri we i ken kamap olsem piksa long ol lain i kam bihain taim.

Em bin tok Madang em i asples long sampela namba wan misinari olsem Rhenis misinari na bisnis man Jimmy McClay na Von Hagen.

"Bikpela samting we yumi ken lukluk long ol em long kalsa na gutpela Kristen pasin bilong yumi ken holim pas kalsa na Kristen bilip bilong yumi yet.

Em bin tok tu olsem Nesenel Sinot o kibung bilong sios bai kamap long neks yia long Finsafen.

Long wankain taim tu, gavman James Yali i bin tok ol samting long sait bilong spirit na tu, ol samting bilong graun i mas go wantaim.



AMAMASIM BIKDE:Ol Luteran Sios memba insait long wanpela sios selebren bilong ol.

TOK LUKAUT

wantaim

DAVID EPHRAIM



Luksave long samting i bagarapim kantri

NSAIT long planti save, skul na dijital olusen yumi stap. Tude i mas i gat strong-pela skul, wokbung wantaim we i ken kirapim o kamapim rot bilong gutpela sevis long pipel. Nau yumi wok long wokabaut i go insait long nupela dekeid o 10-pela yia.

Gavman wantaim olgeta pipel bilong Papua Niugini, em taim nau long tingting na luksave long ol samting we i wok long traim stopim na bagarapim ron bilong kantri. Long dispela nupela wokabaut yumi statim yu mas strongim ol gutpela samting we bai wokim gutpela ron bilong kantri.

Wanpela bikpela samting we kantri i wok long kisim bikpela hevi long en em ol disisen we ol memba bilong Palamen i wokim. Planti taim moa long 80 pesen bilong ol pipel bilong yumi ol ples i save kisim bikpela bagarap long dispela.

Olsem long taim Gavman i wokim disisen we planti i no save long en bikos yumi olgeta olsem planti pipel bilong yumi i no save long rit na rait. Olsem na yumi mas luksave long dispela na wok bung wantaim long daunim dispela hevi.

Yumi yet lukim planti samting we ol lida bilong Palamen i wokim tasol planti ol pipel i pret long tokaut bikos nogut ol i kisim birua.

Wanpela oganaisesen we i wok long traim rausim pasin korapsen em Transparency International.

Yumi olgeta manmeri mas sapatim wok bilong ol tude. Tasol sampela wik i go pinis ol sampela lain i wok long ringim dispela opis na traim tok pretim ol wok manmeri bilong TI PNG.

Mi laik singaut long yu dispela man o meri i laik stopim bikos yu wok long traim stopim ai na maus bilong planti ol liklik grasrut manmeri.

Mi olsem memba bilong Transparency International laik wokim klia olsem bai mi sanap strong na wokim gol na het tok bilong TI PNG i karim kalkai.

Yumi stap insait long nupela hap histori olsem na noken traim soim strong bilong yu wantaim hait pasin.

Kamaut na wokim samting stret. Trupela pikinini man bilong Papua Niugini mas sanap long gutpela bilong pipel. I no toktok tumas.

Ol Edukesen Etministreta sindaun long ol kos

BIHAINIM ol Edukesen Rifom na nupela Edukesen Plen bilong 10-pela yia i kam, ol tisa na skul Etministreta i wok long sindaun long ol woksop bilong kisim gutpela save na tu, skruim save bilong ol long kamapim gut wok.

Edukesen Dipatmen i bin karimaut tripela sotpela kos long ol sapat woklain bilong em bilong helpim ol i karimaut gut wok long stretim ol hevi, raitim ripot na fainens menesmen.

AusAID i bin givim mani long sapatim tripela program ya. Stretim hevi (Conflict Resolution) na Ripot Raiting kos em ol bin holim long Intenesenel Edukesen Ejensi

TAFE Kolis long Ela Bis. Edukesen Kapasiti Biding Program (ECBP) i bin givim sapat long tupela kos ya.

Fainens Menesmen Kos we Fainens Menesmen Trening Program long Fainens Dipatmen i sapatim wantaim mani na ol bin holim trening woksop long

Getwe Hotel long Mosbi.

Ekting Edukesen Seketeri Dokta Joseph Pagelio i tok ol bin luksave long laik bilong ol woklain olsem ol i mas gat save long ol dispela samting long helpim ol i karimaut gut wok bilong ol na ol i kisim ol woklain bilong sindaun insait long ol kos ya. Luksave na makim ol woklain long ol kos i bihainim wanpela wok sevei ol bin karimaut klostu long 2004.

"As tingting bilong holim ol kos em long helpim na strongim ol save bilong ol woklain na ol i ken karimaut gut wok bilong ol," Dokta Pagelio i tok.

Ol opisa i amamas long sindaun long kos na ol i tok i gutpela ol i wokim ol kos bikos em bai helpim ol long karimaut gut wok long sevim ol pipel na kantri. Na ol i tok i moabeta long moa wanwok bilong ol i kisim ol dispela kos na ol i ken kamapim sampela gutpela senis long wok bilong ol. Long wankain taim, ol Distrik Edukesen

Etministreta bilong 4-pela rijen long kantri i bin sindaun long ol menesmen woksop long kisim moa save bilong helpim ol long wok etministresen, menesmen na supavaisim ol woklain insait long ol distrik bilong ol.

Dokta Pagelio i tok ol i wokim dispela program long strongim ol woklain insait long ol distrik edukesen opis i wok wantaim long inapim ol gol na developim ol plen long go hetim ol senis i stap insait long Nesenel Edukesen Plen bilong 2004 inap long 2015.

Ol dispela woksop i hap bilong ol sapat kos Edukesen Dipatmen i wok long givim long ol distrik bilong helpim ol strongim wok bilong lukautim na monitaim edukesen rifom long ol dispela rot. Yusim gut ol risos olsem kisim ol gutpela tisa, kamapim ol gutpela tingting long glasim na skelim ol deta bilong polisi na raitim gut ol ripot, kodinetim ol sotpela kos, insevis na woksop.



MOROBE KAM GUT: Yunitek i amamsim 30 anivesari Indipendens selebresin long kainkain aktiviti. Hia em kaiserel de long dispela taim na ol asples i kam mekimsave.

Bikpela selebret long Yunitek

YUNIVESITI ov Teknoloji long Lae, Morobe provins i bin kamap laip tru long las wiken taim em i selebretim namba 30 anivesari bilong indipendens bilong kantri.

Ol famili, poroman na sumatin i bin amamasim long lukim na stap insait long ol samting i bin kamap long Yunivesiti kempus stat yet long Mande Septemba 12 inap long Sarere Septemba 17.

Long Mande, gutpela musik bilong ol string ben i bin pulapim kempus taim long Tunde, ol bin lukim ol muvi we ol PNG ekta i stap insait long em olsem Man Friday we William Takaku i stap insait long em na Marabe. Long Trinde ol bin gat dibet long ol bikpela samting long kantri olsem Wantok sistem na sapos

em i gutpela o nogat long PNG, Pasin pamuk i kam aninit long lo long PNG na Yunitek i kamapim ol kwaliti sumatin o nogat.

Fraide i bin stat wantaim nesenel mas we ol skul long Lae siti long elementeri i go long teseri level i bin mas i go na wokim fleg resing seremoni na bihain ol kaiserel ektiviti i kamap.

Sarere i bin de bilong pilai na sasim Mista na Mis Tredisenel Yunitek resis wantaim ol singsing kwaia, kantri, gospel na ol arapela kain musik i bin kamap.

Olgeta selebresen i bin pinis long Sande wantaim kombain sios sevis long moning na las em ol spots fainols na givim ol prais long ol lain i win.

Woksop helpim skruim literesi

Paulus Tali i raitim

LITERESI woksop i helpim olpela memba bilong Oro long go bek long ples na helpim ol pipel bilong em.

Bipo Oro memba Lucas Aguibo i bin kam long Mosbi long kisim entaitolmen bilong ol pablik sevan long Oro na long wain kain taim em bin harim long literesi woksop Baibol Trenslesen Asosiesen (BTA) i bin mekim.

Na em i bin sindaun long dispela wanpela wik woksop long las mun hia long Mosbi.

Mista Aguibo i lukim olsem dispela literesi woksop i helpim em tru long go bek na lainim ol narapela long ples bilong em long rot bilong rit na rait.

Em i tok nau yet planti bilong yumi ino klia gut long rit na rait na dispela em bikpela asua bilong yumi long PNG.

Em i tok taim em i stap memba, em bin kirapim wanpela skul ol i kolim long Aguibo Praimeri skul i stap inap 9- pela kgrimas.


Em i tok em bai go bek long ples na lainim ol tisa bilong em long literesi program.

Em i tok bipo em i stap memba em i no bin klia long rot we literesi program i ron long en tasol woksop i helpim em klia gut.

Em i tok em i luksave nau olsem moa senis i kamap long laip bilong em na bikpela luksave i go long kamapim dispela woksop we i helpim tingting bilong em i kamap klia.



KALSA I BIKPELA SAMTING: OL Divain Wod Yunivesiti sumatin long Madang na pablik i bin gat sans long lukim ol naispela droing bilong ol Ats sumatin bilong Malala Sekonderi Skul. Wanpela Ats So i bin kamap long Friendship Laibreri bilong Divain Wod Yunivesiti olsem hap long amamasim namba 30 indipenden anivesari selebresen bilong kantri.



Salim ol pas i kam long WANTOK NUSPEPA: P.O. Box 1982, Boroko N.C.D 111 Fax: 325 2579 Email: word@global.net.pg

Morobe Seavings na Lons indai pinis?

Dia Edita

MI WANPELA grasrut man bilong Kabwum na laik save long wanpela benk ol kolim Morobe Seavings and Lons Opis i stap long wanem hap long Lae siti.

Long yia 2002 na 2001 taim memba bilong Kabwum Mista Bob Dadae i stap olsem provinsel siaman bilong Komes na Indastri na go raun long Kabwum distrik, em i tokim mipela pipel bilong ples long putim mani long dispela benk. Bihain bai mipela kisim dinau na kisim mani long baim skul fi na wokim bisnis samting.

Long Derim stesin ol opim brens pinis na mipela pipel putim pinis planti mani bilong mipela.

Long 2002 ileksen Mista Bob Dadae bin kempin raun na tok bai em putim dispela benk long olgeta hap bilong Kabwum. Bihain long em winim ileksen pinis dispela benk brens long Derim em pas na tu nogat nupela brens kamap long Selepet, Komba, Yalumet na Yus eria olsem em promis long ileksen taim.

Mi wanpela long ol manmeri husat i bin putim mani long Derim brens. Mi kamap long Lae na askim long opis long Morobe Seavings na Lons Opis na sampela man i tok i go long opis bilong Mista Bob Dadae em bos bilong dispela beng. Sampela i tok go long Komes opis na sampela tok dispela beng i benkras na ol pasim pinis na i no moa wok.

Nau mi wari long mani bilong mi. Olsem na mi laik askim Memba bilong Kabwum na Komes Opis long tok klia long dispela beng Morobe Seavings na Lons i tru indai pinis o nogat. Sapos indai pinis bai yupela mekim wanem long mani bilong mipela grasrut? Yu husat brata na susa yu gat save long dispela beng i tru indai o stap orait yu ken rait i kam long Wantok na mi lukim.

OI HIANGI
DERIM-KABWUM
MOROBE PROVINS

Amamas long raun long siti bilong God Jisas

Dia Edita

PLIS givim mi spes long toktok wantaim ol pikini ni bilong God. Mi laik tok amamas na bel hevi tu. Mi raun tripela wik long Lae siti, Morobe provins em wanpela long 86 distrik long PNG. Mi laik soim tingting bilong mi aut nau. Papua Niugini i win pinis em tru. Mi raun long Independens 2005 long Lae mi lukim olsem kaikai i maopinis, ol brata, susa na papamama bilong Jisas ol bung pinis. Tasol mi gat belhevi tru. Dispela holi graun bilong Jisas watpo yupela i no bosim gut na em sting pinis klostu bai em i rausim na kamapim nupela siti olsem na kauntim Buk Song 119:46.

Bai mi tokim ol king long tok bilong yu, mi no inap sem long mekim olsem. Mi sanap long bilip bilong mi autim olsem Somare statim Gavman na Somare pinis Gavman mi bilip bai yumi lusim nem Praim Minista na yumi go long tumbuna pasin yumi kisim king na kain kain hevi bai pinis na Jisas yet bai bosim kantri bilong em Papua Niugini.

Ol wantok bilong 86 distrik long PNG noken bel hevi. Bosim graun bilong yu long tok tru na yu gat kampani na bosim haus mani na pinis God wetim yumi. Mi laik tok tru lukim K50 pepa mani na lukim king bilong yumi piksa slip antap yumi amamas na paitim han.

Mi man bilong ples. Yu husat lukim mi, mi amamas tasol long toktok wantaim yu. Welkam tasol long lukim yupela. Mi karim hevi inap pinis. Husat bai helpim mi sios o gavman?

KAUKISA NAMON
SALAMAUA
MOROBE PROVINS

Tingim laip bilong yu na raun long nait klab

Dia Edita

MI BILONG Jika Mukuka insait long ples Moika, Westen Hailans provins. Nau mi stap long Pot Mosbi. Dispela em i namba tu taim mi laik tok tok long laip bilong ol manmeri bilong nait klab.

Yupela gat wanpela laip tasol. Dispela laip yupela karim raun long en i nogat


wanpela man bilong dispela graun i bin wokim, nogat tru.

Wanpela laip yu wok long karim raun long ol nait klab em dispela laip God i wokim long Heven na givim long yu. Sapos laip bilong yumi bagarap i nogat wanpela man bilong dispela graun bai stretim. Planti yupela ol manmeri bilong nait klab yupela

karim sik HIV/AIDS tu na givim long narapela narapela na bagarapim gutpela laip bilong yupela yet. Tingim laip bilong yu na raun long ol nait klab.

Tenk yu tru.

ANIS MOIA
POT MOSBI
NCD



Toksave: Sampela ol pas mipela i kisim i longpela tumas na i no givim spes long ol arapela pas, plis raitim liklik pas. Na tu putim nem na adres bilong yu long olgeta pas yu salim i kam, tenkyu. - Edita

Noken pait long de bilong Sabat

Dia Edita

MI SAVE amamas long ritim stori bilong planti manmeri save raitim long Wantok Niuspepa long Baibel. Mi laik autim hau Sabat na Sande lotu i stap. God na Jisas i no tupela, nogat tru. Na Papa God na Jisas Pikinini em tupela tasol i stap. Ol gutpela kristen brata na susa ol waitman paolim trupela lotu. Na ol senisim lo bilong God na planti sios kirap long wol. Olsem na mi laik autim histri bilong bipo, yu lukim Buk Daniel 7:25 tok ol man bai senisim lo bilong God na pasin bilong lotu de. Orait nau yu lukim Roman Empera bilong Rom, Konstantin em i senisim Sabat go long Sande na nau Roman Katolik papa bilong Sande wosip na ol 600 sios i stap aninit long Roman Katolik sios nau na SDA Misin kipim Sabat na go het long lotuim God long olgeta taim. Olsem na mi no laikim yu Sande Sios grup kros long wan lotu bilong yu, na sapos yu laik kipim Sabat orait Jisas em man bilong lotuim God long Sabat de. Em tasol tok i stap gut.

PETER P. NANA
MT HAGEN
WESTEN HAILANS PROVINS

Pipel bilong Wau Bulolo i no wanbel long baundri bai bruk

Dia Edita

MIPELA ol manmeri o pipel bilong Wau na Bulolo, mipela i no amamas long Wau Bulolo bai bruk i go tupela. Mi laik tok klia long Nesenel Gavman long noken brukim baundri bilong dispela tupela distrik. Wau Bulolo i no olsem wanpela siti olsem Lae.

Em tasol liklik wari bilong mi na husat i laik sapotim o agensim, welkam tasol long rait long Wantok Niuspepa.

KANGEN ZIMMINU
WAU
MOROBE PROVINS

Maski apim nem bilong Maprik pipel tasol

Dia Edita

MI WANPELA alu wiren o mangi Yangkok. Mi laik sapotim tru brata ya W. Leo - Yameri Mulex, pas bilong brata ya i bin kamap long Wantok Niuspepa long Ogas 25, 2005. Brata tok bilong yu em i tru olsem na Yangkok, Lumi na Nuku i save givim bikpela hap mani i go long Is Sepik. Maprik i kisim gutpela nem bikos long kes krop bilong Sandaun provins.

Em tasol na yu husat man o meri i laik sapotim o agensim plis rait tasol long Wantok Niuspepa na bai mi i ken lukim.

F.SALUN
ALU WIREN
SANDAUN PROVINS

Nait klab i no pinis, bai sik AIDS i no pinis

Dia Edita

GIVIM liklik spes na mi laik autim wari bilong mi. Mi save ritim long Wantok Niuspepa na harim long radio olsem Gavman i save toktok planti long sik AIDS na tromoi bikpela bikpela moni long en. Na tu ol narapela kantri tu i save givim helpim mani long daunim dispela sik AIDS na i no pinis yet. Long las wik mi lukim long niuspepa Sosei Developmen Minista Dame Carol Kidu i tok moa yangpela meri i slip wantaim ol bikpela man. I gat planti nait klab long PNG na ol yangpela meri i laikim moni ol i save i go long hap na slip wantaim ol

biksot. Bihain ol kisim dispela sik AIDS. Olsem na mi rait bilong yumi wan wan manmeri long autim wari bilong yumi i go long Nesenel Eksektiv Kaunsil bai ol i ken lukluk long em. Ol i mas rausim olgeta nait klab long kantri. Mi laik tok PNG em kristen kantri na yupela ol biksot i mekim pamuk pasin na bagarapim dispela gut nem Kristen kantri insait long wol. Mipela ol kristen i kisim sem bilong yupela ol wel dok na pik i nogat tingting na save bilong yupela.

W. WANGS
KIMBE
WES NU
BRITEN
PROVINS

Noken kisim bia nating long ol man

Dia Edita

Mi laik givim tok lukaut long ol yangpela meri husat i save go long ol nait klab long Mosbi.

No ken tru larim ol man i baim bia bilong yu nating taim yu no save long ol. Taim ol i oferim yu bia, yu mas tok nogat.


Yu yet baim bia bilong yu o ol pren yu go wantaim. Mi tok olsem long wanem, mi bin lukim wanpela meri Papua em wanpela man Hailans i wok long sautim em bia.

Em i dringim ol bia bilong man Hailans pinis na i laik i go tasol man Hailans i blokim em. Em i ronim em long olgeta kona bilong dispela nait klab.

Sapos ol sekiuriti i no bin haitim dispela meri, mi no save wanem samting bai i kamap long em.

Olsem na sapos yu nogat moni long baim bia no ken go long nait klab na parasait long ol man nogut bai yu kisim birua.

T. BAUNSA
ERIMA
NCD



Pasbuk bilong wokman tasol o?

WANPELA opisa bilong Bank South Pacific i bin tokim mi olsem pasbuk bilong mi i pas olgeta nau. Olsem na sapos mi laik, mi ken opim nupela pasbuk gen. Dispela i givim mi bikpela wari tru bikos benk i pasim pasbuk bilong mi long Trinde na long Fonde mi go insait long putim sampela mani i go insait long pasbuk bilong mi.

Dispela hevi i kamap bikos mi no bin wok long tripela mun olgeta. Mi bin kamap pasindia bikos mi lusim wok na mi no save kisim potnait pe moa.

Mi kamap pasindia long tripela mun na pasbuk bilong mi tu i nogat mani i go insait long en long tripela mun olgeta. Olsem na benk i tok mi mas dai pinis nau na pasbuk ya i nogat papa long en nau.

Sori tru, mi bin stap kastoma bilong BSP benk long taim mi yangpela man yet stat long 1990 i kam inap nau. Nau benk i tromoi mi go ausait olsem tasol bikos mi nogat mani long pasbuk ya long tripela mun tasol.



Opisa long benk i tokim mi olsem sapos mi laik opim nupela pasbuk orait mi mas go lukim wanpela kot mejistret o kaunsela lida bilong lokal level gavman o wanpela hetmasta o wanpela akaunten husat i gat nem wantaim PNG Akaunting Asosiesen. Tasol ol dispela man em planti i no save gut long ml. Man i save gut long mi em bos o pei masta bilong mi long wok. Mi ting bai kampani bilong mi i ken raitim pas tasol na tokaut long mi tasol dispela opisa bilong benk i tok polsi bilong ol i senis pinis. Planti lain i save giaman olsem na em i mas banisim gut benk long noken bungim hevi.

Mi pilim stret olsem dispela wokman bilong benk i no inap harim wari bilong mi moa. Mi

laik askim em sapos em i ken opim dispela pasbuk gen bikos nau mi wok na potnait pe bilong mi laik kam insait long dispela pasbuk na bai i kam moa yet long olgeta potnait taim. Tasol em i no givim mi sans long toktok moa.

Orait mi wari na go tasol mi askim wanpela opisa bilong Bank South Pacific (BSP) gen na em tok, em i ken opim dispela pasbuk gen. Olsem na mi go lukim em long narapela de na em i opim dispela pasbuk bilong mi gen. Em i go lukim wanpela bos bilong benk na kisim tok orait long em na ol i sasim mi K20 na opim pasbuk ya gen na mi yusim long apin-un. Isl tru. Tasol narapela opisa pastaim ya em hat tru.

Mi askim wanpela longpela taim wokman bilong narapela benk long ANZ benk na em i tokim mi olsem ol i no save pasim pasbuk bilong ol manmeri nating nating. Sapos wanpela pasbuk i nogat mani i kam long em moa long 6-pela mun orait ol i save putim stop long pasbuk ya i go stap tasol wetim sapos papa bilong dispela pas-

buk bai kam bek na yusim o nogat.

Long Westpac benk mi gat wanpela pasbuk we i stap longpela taim wantaim mi nau. Nogat man i putim mani i go insait long pasbuk ya abrusim wanpela yia olgeta. Tasol benk i toksave olsem mi ken putim mani na ol i ken stretim ol pepa wok bihain bikos em i slip (domen) longpela taim nating.

Tasol dispela opisa bilong BSP benk i tromoi pasbuk bilong mi bihain long tripela mun tasol bikos i nogat mani i kam long pasbuk ya.

Dispela i soim olsem ol ples manmeri i mas tingim na putim mani long pasbuk bilong ol olgeta taim. Nogut tripela mun bai pasbuk bilong ol i pas olgeta. Benk sas tu i bin kaikai liklik wan silling i bin stap long pasbuk ya na kaikaim i go daun olgeta.

Mi ting dispela kain samting em benk i mas mekim klia tru long ol kastoma bilong ol gut tru. Nogut ol ples lain bai pret na haitim mani long graun.

Josua - Salvesen bilong God

MINING bilong nem Josua em i Salvesen. God i kisim bek yumi na helpim yumi.

Josua em i wanpela lida husat i kisim ples bilong Moses wanpela bikpela lida na mekim gutpela wok na i bin winim planti pait na mekim ol lain Israel i kisim planti hap graun we God i bin promis long givim ol pipel bilong em.

Josua Em i wanpela lida husat i soim strongpela bilip long God na gutpela pasin long ol pipel. Em i bin wok aninit long Moses na lainim lidasip we i pasin bilong Moses. Nau Moses i kamap lapun na dai pinis orait, God i tokim Josua long kisim ples olsem lida. Olsem na Josua i gat singaut na sapot bilong God na bilong ol pipel long kamap lida.

Dispela em i wanpela gutpela we long kamap lida. Yumi ken kisim bikpela skul long laip na Lidasip stail bilong Josua insait long Kristen laip na wokabaut bilong yumi yet na tu insait long Kristen lidasip wok bilong yumi tu.

Sampela samting yumi ken lainim long laip bilong Josua em:

1. Em i wanpela strongpela Lida long

OL PRINSIPOL BILONG GUTPELA LIDA

wantaim Evangelist

OHARE JABERE

bilip, pasin na wok bilong em. Jos 1:7-9;

2. Em i gat rispekt na sapot o laikim bilong ol pipel long stap Lida. Jos 1: 17-18;

3. Em i save winim ol birua na helpim ol pipel bilong God i stap olsem win manmeri. Jos 2: 11,24

4. God yet i stap wantaim Josua na Lidasip na wok bilong em i kamap gutpela moa. Jos 6: 27;

5. Em i bungim Komanda bilong Ami bilong Heven na rausim su long lek bilong em na kisim nupela strong na plen o rot bilong winim Jeriko. Jos 5: 15, 6: 1-5;

6. Em i winim moa teritori na surikim birua na kisim moa graun.

7. Em i tokaut strong long pipel long lotu na bihainim God wanpela tasol na mekim em i nambawan long laip bilong ol. Em yet na famili bilong em bai ol i



bihainim God wanpela tasol. Jos 24: 14-15;

8. Long olgeta laip na Lidasip bilong Josua ol pipel i bihainim God olgeta de aninit long laip na taim bilong Josua. Jos 24:31.

Josua em i strongpela Kristen o Billpman tru. Em i strongpela soldia bilong Krales insait long ami bilong God. Em i wanpela gutpela Kristen Lida tru na gutpela piksa bilong yumi long bihainim.

Josua em i gat bel na tingting long pipel na Nesen i go pas moa long ol laik bilong em yet. Na em i laik amamasim na litimapim nem bilong God na bai blesing na helpim bilong God i ken stap olsem wantaim em na pipel bilong Israel.

Josua em i kamap long taim we pipel i nidim tru strongpela Lida olsem em.

Ol i nidim Josua stret long brukim Jordan, daunim Jeriko, daunim birua na kisim moa graun. Josua em i rait man long

rait taim. Yumi tu mas kisim spirit na pasin bilong Josua long kamap gutpela lida long dispela taim.

WANTOK

Published Weekly, Wednesday, for Word Publishing Company, Ltd.

P.O. Box 1982, Boroko, NCD Papua New Guinea

Telephone: 325 2500

Fax: 325 2579

Email: word@global.net.pg

Pe bilong wanpela yia 52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Justin Hansu Kili

Editor
Neville Choi

Published by Justin Hansu Kili, MBE of Section 58, Allotment 3, Office 2, Waigani Drive.

Word Publishing Company Limited is owned by the four major churches of Papua New Guinea - Catholics 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.

WANTOK KOMENTRI

Welkam Prinses Anne

ASTE namba wan pikinini meri bilong Kwin Elizabeth bilong kantri Inglan i kamap long Papua Niugini.

Bikpela tok welkam tru i bin kamap long Jacksons Ples balus long Mosbi. Olgeta bikman i bin go kamap long bungim Her Royal Highness Prinses Anne.

Insait long ol bikpela rot bilong Mosbi siti, wok i kamap long stailim sait sait bilong rot, stretim olgeta liklik hul long rot na tu, long wik i go pinis, i bin i gat planti giaman ron bilong redi long em long kam.

Olgeta dispela wok kamap bihain long amamasim bilong tripela ten krismas bilong kantri bilong yumi i mekim Mosbi siti i kamap nais tru.

Tasol dispela kain wok bai go het inap wanem taim tru? Sapos Prinses Anne i lusim PNG na go bek, bai ol dispela gutpela wok kamap i go het, o bai ol lait bihainim bikpela Poreporena Friwe bai stat tudak klostu klostu gen.

O bai yumi ron long ol bikpela rot insait long Mosbi na ting mipela i ron long wanpela bus rot nating.

Olgeta dispela samting em yumi ol pipel i mas klia go long en tu. Bai mipela i kisim wanem samting tru long raun bilong Prinses Anne i kam olsem long PNG?

Tru tumas, dispela luksave bilong Royal famili bilong Inglan i stap bipo yet na i stap nau tu. Bai mipela i ken kisim moa nius na toktok long raun bilong Prinses Anne na dispela bai apim nem bilong kantri bilong yumi tu insait long wol nius.

Tasol wanem gen?

Em i tru olsem mipela bai mas givim luksave long Prinses Anne. Dispela em mipela i klia long en. Tasol ol lain manmeri i stap long ol bus ples insait long kantri bai olsem wanem? Ol bai i ken lukim ol gutpela kaikai bilong dispela raun bilong pikinini bilong Kwin o nogat? Sapos nogat, bilong wanem na ol bai i mas givim luksave?

Wanem as tru?

TUPELA wik i klostu pinis nau bihain long bikpela wok bung i kamap namel long Transparensi Intanesenel, Midia Kaunsil na ol lain Komyuniti Koligin Agensim Korapsen (CCAC) long kisim sapot bilong pablik long rausim tupela bil bilong tupela memba bilong Palamen.

I tru olsem dispela tupela bil ol i laik karim i go long Palamen bilong rausim mekimsave bilong rausim ol memba i mekim asua; na bilong apim mak bilong mani ol memba i save kisim.

Tasol wanem as tru na dispela tupela memba i kamapim ol dispela bil. Dispela tupela memba i mas kamaut na tok klia long as bilong kamapim dispela tupela bil.

Bikpela as toktok i wok long kamap nau i bihainim toktok olsem dispela tupela bil bai kaikaim nating mani bilong gavman long mekim wok developmen na daunim strong bilong kot bilong ol lida. Yumi ken mekim kain kain toktok long en na bihainim tingting bilong yumi yet, tasol dispela tupela memba i mas kamaut na tok klia long as tingting bilong ol.

Naispela Raun long



MAMA NA PIKININI: Mama Moetua i sku! Minista long Takamoa Tjolojikel Kolis wantaim tupela pikinini em Badira i gat 5-pela krismas na Roimata i gat 8-pela krismas. Man bilong em ina i sku! minista tu.



HAILAN PARADAIS: Tru tumas, hap paradais i stap hia olsem ol WACC-Pasifik konferens lain i bin painaut taim ol i raun lukim ol ples long Rarotonga. Yu ken raunim ailan long tripela a awa samting tasol.



KISOM BLESING: Nupela WACC-Pasifik Eksekutiv i kisim blesing.

Veronica Hatutasi i raitim

WOK ripota i ken kisim yu i go long ol ples we yu ino inap long ting bai yu lukim insait long laip bilong yu.

Yu ken laik tu sapos yu painimaut ples we bai yu go long en em ples we yu save driman long lukim tasol yu save olsem bai i nogat.

Ol wansolwara ailan kantri bilong yumi tu em ol gutpela naispela ples bilong go limlimbur long ol na tu, yumi ken lainim sampela samting long ol long kamapim gut laip na sindaun bek long famili, komyuniti na kantri.

Mi bin laki long go long Kuk Allan long wik bipo las, bilong stap insait long wanpela wik sios komyunikesen konferens i bin kamap long Rarotonga, kapitel bilong Kuk Ailan.

Plantim bilong yumi i bin save harim ol naispela wansolwara musik na wanpela i pas long yu bilong mi em, "Waiting on the Beach" Pepe na ol lain Rarotongans i save singim na pairap stret long ol redlo stesen long kantri long ol gut taim yia bilong 1970's. Na taim bos bilong mi i tok bai mi go long Rarotonga bung, mi bin laikim long lukim dispela naispela ples mi harim musik na ol stori long em i gat ol gutpela pipel bilong paitim yukalele na singsing na danis hula hula i gat pasin long amamas lukautim ol narapela na ples, we kaikai em olsem "feast" na we ol turis i save pulap kalpsait long lukim na pilim stap isi we taim i no hariap, em paradais we ol i save driman long em long Pasifik. Em kain ples Kuk Allan i ofaim long em.

Ritim moa long stori daunblo stori bilong Wantok Ripota Veronica Hatutasi long lukuk raun bilong em long dispela liklik tasol naispela ailan kantri.

TOK i kamap long Ea Nu Silan balus lain olsem klostu bai mipela i pondaun long Rarotonga ples balus. Em i tudak yet, tasol tulait i wok long bruk isi. Taim long kilok bilong mi i solm 4.45 moning, Sarere Septemba 10.

Mipela i bin lusim hap nait long balus, statim wokabaut long Brisbane ples balus long 2 kilok Sarere apinun na kamap long Oklen ples balus, Nu Silan long 7 kilok nait.

Nu Silan i go pas long tupela awa long PNG na Australia. Na long Nu Silan taim, balus i lusim Oklen long 12 kilok biknait Sarere. Tasol bikos Kuk Allan i stap wanpela de bihain, mipela i go kamap gen long hap taim de Sarere i wok long bruk.

Ea Nu Silan balus i pulap long ol pasindia na turis.

Mi lukuk long windua na lukim ol kala lait daunblo na mi save olsem dispela em Rarotonga. Bipo mi save, isi tru na balus i go daun long graun na mipela i krugutim ples nau.

Kol bilong moning wantaim liklik ren i bung na skri i kol. Tasol dispela i pinis hariap taim naispela kulele musik i pulumapim yau na mi save olsem dispela em kain welkam Kuk Allan i glivim long ol lain i go long ples bilong ol.

Tru tumas, wanpela grup i bilas long ailan stail i paitim kulete na singsing i stap wokim welkam na gut-bai long ol dispela i laik lusim ailan.

Bihain long sekap long imigresen na kastoms, Seketeri bilong Wol

PNG ken kisim skul long ol....

Asosiesen bilong Krlsten Komyunikesens (WACC-Pasifik) konferens bilong Kuk Allan em Tuganes Williams na lain bilong em i kam putim tel flawa long mitupela bilong PNG, em Bruder Michael McManus i Komyunikesens Ats leksera long Divain Wod Yunivesiti long Madang na mi, na kisim mipela i go long Avarua em ples long taun bilong CICC we mipela i bin stap long em long 8-pela de bilong konferens.

Konferens

20-pela deleget i wok wantaim ol Kristen ogenesesen na sios komyunikesen long Fiji, Ameriken na Westen Samoa, Tahiti, Kuk Allan, Tonga, Niue, Kiribati, PNG, Nu Silan na tupela bikman bilong WACC-Wol hetkota opis i bin sindaun long wanpela wik bung long glasim na skellm komyunikesen wok insait long ol sios long Pasifik rijen. Wanpela stetmen bung i bin kamapim long pinis bilong ol i bin tok long yusim komyunikesen long strongim wok bilong sios, bikos long senis long nupela teknoloji. I mas gat trening na netwok namel long ol memba na ogenesesen i mas kisim sait long sapotim ol trangu, humen raits, jastis na gutpela sindaun, lukautim envalronmen na taim WACC i go insait long nupela komyunikesen teknoloji, karimaut wok aninit long stla bilong Kristen pasin. Bung i bin makim nupela Eksekutiv we Viliani Falekaono bilong Katolik Komyunikesens long Tonga dalosis i kamap Presiden na wantaim Reveren Harlesa Faitala bilong Ekalesia Niue olsem namba tu na Raru Seru Verebalavu bilong Metods Sios bilong Fiji na Rotuma olsem Jenerel Seketeri, bai go pas long tripela yia i kam.

Ples na pipel

Gutpela ples i grin tru na klin olgeta. Yu no inap lukim wanpela pipela nabaut long taun, ol haus na pablik eria. Nogat waia banis, raskol pasin i nogat nem long hap na pipel i fri long raun long laik, nogat pretpasin.

Yu ken raunim Rarotonga ailan insait long tripela awa samting, olsem grup bilong mipela i mekim. Rot i gat kolta raunim ailan. Mi ting bai mi lukim sampela ol ples haus olsem yumi gat long em long ol viles tasol nogat. Olgeta haus em ol i wokim long kapa na ol gutpela famili haus i strong. Bikos Kuk Allan i save kisim bagarap long planti saiklon o strongpela win, ol i wokim ol strongpela kapa haus long simen flua na i no dispela i go antap long steps. Taun na ol ples raunim ailan i gat ol hotel, motel, ol ges haus we ol turis i save go long ol.

Ol turis i save pulap kapsalt i go long Kuk Allan long balus na sip na taun na ol liklik ailan i pulap long ol

turis i kam long Amerika, Yurop, Nu Silan, Australia, Japan na Esia.

Sampela turis i save go long Kuk Allan long wokim marit na hanimur bilong ol tasol. Ol i laikim stap isi, naispela nambis, kalsa, gutpela pasin bilong pipel na liklik hap paradais long graun, laip na piing i narakain long dispela ol i save gat long bikpela ples bilong ol.

Kuk Allan i kisim bikpela mani long turis bisnis.

Ol kain halbiskis purpur wantaim ol naispela na bikpela plaua bilong ol i pulumapim ples na i mekim ples i luk-nais. Mipela tripela meri, Fiji, Niue na PNG, i bin mangalim stret ol purpur ya tasol sori tru, bikos long tambu i stap long karim ol purpur na diwai samting bilong wanpela kantri i go long narapela i banisim mipela na mipela i lukim na mangalim tasol. Tiare Maori em purpur i gat naispela smel stret na nesanel purpur bilong Kuk Allan i pulap kapsalt long Rarotonga na i pulim ai na nus stret. Ol i wokim pefum i sanda long em tu na glivim wankain nem, "Tiare Maori" long em.

Hailan Paradais

Kuk Allan i gat maunten tu. Hailan Pradais em wanpela naispela famili motel antap long maunten, samting olsem 2-pela awa draiv long ka long taun. Yu ken lukim gut taun na ol arapela ples na solwara na ol ailan taim yu sanap na lukuk i go aut. Ples ya i gat histri long em bikos em i bin ples bilong King na royel famili bilong Tinamana wanpinis long dispela secret eria ol i kolim long Maungaroa Veli. Mipela i lukim ol Marae o sikret tempol ol pipel i save lotu long ol tumbuna bilong ol. Tutu em meri i menesa long dispela famili motel i soim mipela ples na kisim mipela i go long bus wokabaut na raunim moa long 200 eka eria i go antap gem long maunten we i gat ol stori bilong ol tumbuna, king, hauslan na pipel bilong ol. Mipela i bin gat naispela lans mipela i yusim kokonas lip ol i wivim olsem plet long putim lants. Sapos yu wanpela i save bliip long ol tumbuna, yu ken pilim olsem ol i stap klostu taim yu wokabaut long bikpela hap eria bilong Hailan Paradais. Sapos yu laik wokim weding o marit, ples i stap olsem piksa i solm long en. Bai ai bilong yu i op long ol kain naispela halbiskis purpur long hap.

Yumi long Pasifik i gat pasin bilong amamas long lukautim pipel i kam long narapela hap. Ol Kuk Allan i wankain. Ol i gat gutpela pasin long amamas, singsing, danis na lukautim na glivim presen long ol visita. Kaikai em i olsem "feast" we ol bai putim long tebol ol mumu kaikai olsem taro, pik, pls, urita, kakaruk ol i mumum, rostim long aven, praim wantaim blek sos, banana, tapioka ol i sigirapim na kukim wantaim kokonas long aven, kumu na prut salet, rals, ol kumu na naispela stret em lip taro ol i grisim



MALOLO NA LANS: Grup i raun lukim ples na painim wanpela hap nambis long lans



BIKPELA KAIKAI OLGETA TAIM: Tenkyu tru Avarua Peris long gutpela lukaut bilong yupela. Ol sumatin mama bilong Takamoa Tjolojikel Koles i redim kaikai.

Kuk Ailans

wantaim kokonas na planti ol nalspela kalkal we bai yu pulap nating. Tasol ol bai laik yu kaikai moa. Ol Kuk Ailan em ol bikpela strongpela pipel na planti i gat bikpela skn. Planti bilong ol i mikis wantaim ol masta na ol arapela wan-solwara ailan olsem Samoa, Tonga, Niue na Nu Silan. Ol i strongpela lotu lain tu ya na talm ol i singsing long slos o ol bung, kila long ol. Mipela i bin laik long harim ol singsing peroveta na gita/kulele singsing bilong ol olgeta nait long ol grup we slos i makim ol long redim dina i kalkal bilong nait.

Laipstail

I tru olsem i nogat ples long wol i nogat hevi, wari na trabel. Tasol pasin bilong pipel em i wanpela bikpela samting we i ken kisim kantri i go fowet. Maski Kuk allan i nogat planti risos, o salklon i save bagarapim ol, em na pipel bilong em i gat gutpela laip na yu no inap lukim long ples kila pipel i sot long samting. Mi bin lukim olsem, sapos i no olgeta, klostu olgeta famill i gat ol ka o tupela, bilong ol. Motobaik em i wanpela rot bilong Trensport long taun na ailan. Bai yu kirap nogut long lukim ol i kiklik pikinini man na meri olsem 10-pela kismas, ol mama na bubu i ronim ol motobaik bilong ol long go long sios, skul, ol bung, ples, taun o wanem hap moa. Na ol i no save putim helmet!

Daunbilo mak long mani we wan wan wok manmeri i nap long kisim i stap long \$4 long wanpela awa. Kantri i yusim Dola mani bilong Nu Silan we velyu i klostu wankain olsem mani bilong Australia. Long taun, bai yu lukim planti turis i raun. Na nogat sain bilong ol pipel o yangpela i nogat wok i raun nating long taun o strit. Planti i gat ol liklik wok bilong ol olsem lukautim ol stoa, hendikraf na juwel stoa i gat ol kain nekdes we bikpela em ol pel sal na nekdes, wok long ol hotel na ol arapela bisnis moa. Bai yu kirap nogut long ol dua long ol haus i stap op na nogat pret long sampela lain bai wokim samting stli pasin bikos husat i wokim dispela bai kamapim traipela sem long famill na hauslain bilong wanem olgeta lain bai save.

Long taim bilong pati long wiken, ol pati lain i ken wokabaut i go bek long ples o sapos ka i bungim ol long rot na lusim ol, ol i laki. Ol i ken wokabaut wantaim nogat pret olsem birua bai kamap long rot long hap nait.

Skul long PNG

Liklik wansolwara kantri olsem Kuk Ailan i ken givim yumi sampela gutpela skul.

Olsem pasin. Yumi mas senisim pasin na yumi wan wan i lukautim ol ples, taun na sli bilong yumi. Yumi noken tok dispela em i no asples bilong mi na wokim ol pipela pekpek. Klinim ples, ol strit, noken tromoim pipela na waswas putim ol gutpela kilnpela klos taim yumi raun, lukautim ol bilding na noken wokim graffitil o rait nabaut long ol haus na ol pablik eria. Bikos sapos ples i klin, ol pipel i klin, ol pipel i kam long ausait bai gat gutpela piksa long yumi. Na tu, dispela i gutpela long yumi yet olsem pipel na kantri bai go gut.

Ol lida i mas tingim pipel na putim wok long givim sevis long rot, skul na helt, yusim gut mani long ol dispela eria, kisim moa senis i go long ol rurel eria na ol pipel i ken stp long hap na i no kam pulap nating na raun klangki wokim ol kain trabel long taun. Na ol wok developmen long kantri i ken go het gut.

Save gut long Kuk Ailans

Kapite: Avarua, Rarotonga

Populesen: 17,000 stap nau long kantri 20,000 i stap long Nu Silan na sampela long Australia.

Ol Ailan: 15-pela ailan olgeta long Kuk Ailans grup

Pipel: Polinesia olsem ol Maori, Samoa, Tahiti, Tonga, Niue na Tuvalu. Skin i braun na longpela gras.

Stap we: Long Is Pasifik, klostu long Nu Silan na Tahiti. Ol i gat fri asosiesen wan taim Nu Silan. Min olsem ol i ken kam na go long Nu Silan long stap na wok wan taim nogat paspot o visa samting.

Mani yusim: Nu Silan Dola. Kantri kisim mani long: Turisim

Lotu: Kristen- Kuk Ailan Kristen Sios (CICC) em Metodis na London Misinari Sosaiti i bung wantaim na fomim CICC, Katolik, Momons na ol arapela moa.

Tok gutbai

Nogat moa musik long ol pati ples, ol pati lain i wok long tek op long ka, sampela i wokabaut i go. Lukluk i go long solwara i bruk isi isi long waitpela nambis. Piksa bilong sampela liklik allan longwe em taim mipela i lusim Avarua long tri kilok Sarere bikroning na ron i go long ples balus. Nalspela smel bilong Taire Maori purpur i pulapim nus na wantaim laspela lukluk i go bek, mipela lain PNG, Niue, Tonga na Samoa i bin tok kila Orana taim bas i kisim mipela i go long ples balus na kisim Ea Nu Silan balus i go olsem long Okien na bihain, bruk i go long ol wan wan kantri mipela i kam long em. Mi amamas long gat sans long go lukim dispela nalspela ples long sotpela taim tasol.



AILAN STAIL: Ol sumatin bilong Takamoa Tiolojikel Kolis i pilaim ukulele na singsing long nait bihain long kaikai long amamasim ol konferens lain

2005 PNG Okupesene Helt na Sefti Enuel Konfrens (namba 13) na Tred Fe

Namba 20 de bilong mun Oktoba 2005 Holiday Inn Pot Mosbi

Het Tok: "Okupesene Sefti, Helt na Envairomen em Bisnis bilong Olgeta." Dispela konfrens bai lukluk long ol gutpela wok menesmen long helt, sefti na envairomen (HSAE) sistem insait long ples bilong wok

Konfrens Program 20/10/05

Tok Welkam
Opening - Praim Minista o mausman bilong em

SESEN WAN - gutpela menesmen bilong ol sefti sistem insait long wok ples

Pepa - Sekretri bilong Dipatmen bilong Leba o wok - OHAS lukautim ol wokmanmeri
Ol mausman bilong indastri

SESEN TU - gutpela menesmen bilong ol helt sistem insait long wok ples
Pepa - Helt Dipatmen
Ol mausman bilong indastri

SESEN TRI - gutpela menesmen bilong ol envairomen sistem insait long wok ples
Pepa - ol Nupela Envairomen Ekt na regulesen - Sekretri bilong Dipatmen bilong Envairomen na Konsavesen
Ol mausman bilong indastri

SESEN FO - gutpela menesmen bilong helt, sefti na envairomen (HSAE) sistem insait long wok ples
Pepa i - Insurens Kaunsil bilong PNG
Ol mausman bilong Maining, trenspot, rurel indastri

OL TOKTOK BILONG PINISIM
Minista bilong Leba
Ol posta pepa - ol liklik ailan pepa

ENUEL JENEREL MITING SEFTI PNG

KOKTEL PATI

Ples Deleget bai slip long en (go stret long hotel)

Gateway	K292.60/wanpela nait jkramer@coralseahotel.com.pg
Shady Rest	K181.50/193.60/wanpela nait reservations@shadyrest.com.pg

Stori bilong Nominesen

Mi/Mipela laik kamap long SEFTI PNG Namba 13 Enuel Konfrens we bai i kamap long namba 20 de bilong mun Oktoba 2005

Namba bilong ples bilong konfrens

Ol Nem.....

Ol Posisen.....

Kampani.....

Pos Opis Bokis Namba.....

Email adres.....

Telepon.....Feks.....

Bai yu baim olsem wanem
Salim dispela fom na pelmen i go stret long SEFTI - PNG - 2005 Conference
PO Box 286
Port Moresby
Fax 3210630
Email sefti_admin@global.net.pg
Konfrens Kodineta - Dick McCarthy
McCarthy & Associates (forestry) Pty Ltd

PE BILONG KONFRENS
K70.00 bilong ol SEFTI-PNG memba
K90 bilong ol non memba

Ol bikpela Sponsa
Coca-Cola Amatil (PNG) Ltd
Ok Tedi
PNG Forest Industries Assoc
RH Group of Companies

Ol Tred Fe Eksibita
ABC Signs
Chamber of Mines & Petroleum
National School Nursery project
Origin Energy; SEFTI PNG

Ol Sponsa
Oil Search, UMW

Lukautim tumbuna bilas...

James Kila i raitim

WANPELA naispela yangpela meri, nem bilong em Miriam Supuma i bin bisi stret na wokabaut raun namel long ol lain singsing grup long Goroka Kalsarel So we i bin kamap tupela wiken i go pinis na i wok long givim aut wanpela pepa karamap long sampela lain ol tumbuna singsing grup na givim sampela skul toktok long ol.

Dispela yangpela meri Miriam em bilong ples Gembogl long Simbu provins na em wanpela baiolojis o savemeri bilong wok hat o mekim ol wok risets long lukautim gut bus, wara na graun bilong yumi. Em i wok wantaim Wail Laip Konvesesin Sosaiti (WCS) long sait bilong Konvesesin, Edukesen na Risets.

Insait long dispela kempein bilong Miriam wantaim WCS, ol i painimaut olsem pisin gras na ol narapela wail laip skin bilong ol enimol bilong bilas nau yet i hat tru long painim. Na prais bilong ol dispela samting nau tu i wok long go dia tumas.

Olsem na Miriam wantaim ogenaisisin bilong em WCS i bin kamap wantaim sampela kain rot o wei bilong helpim ol pipel bilong PNG insait long ol ples na hauslain long sevim na lukautim ol bilas ol i gat long en nau yet. Long dispela rot ol bilas olsem kangal bilong pisin na ol skin bilong ol enimol olsem kapul bai i ken stap longpela taim.

Bilas i mas drai oltaim

Long nambawan rot WCS i lukim em olsem ol pisin gras na skin bilong ol enimol olsem kapul na ol narapela bilas i mas stap drai oltaim. Sapos gras bilong pisin ol skin bilong ol wail-laip i wet, ol manmeri i mas draim gut pastaim na bihain ol i putim i go insait long wanpela bokis o mambu.

Noken tru draim gras bilong pisin o skin bilong kapul na ol narapela wail-laip long simuk bilong paia. Dispela bai bagarapim kata bilong pisin gras o skin bilong wail-laip. Ol manmeri i mas draim pisin gras na skin bilong ol wail-laip long san we liklik win i mas kisim.

Bilas i mas stap klin

Namba tu rot WCS i laikim ol manmeri i bihain em olsem ol pisin-gras na wail-laip skin i mas stap klin olgeta taim. Ol i mas longwe long das na simuk bilong paia. Ol manmeri i mas

Yangpela meri strongim stretpela rot bilong lukautim pisin gras na skin bilong kapul

wasim han pastaim long ol i holim gras bilong pisin o skin bilong wail laip. Ol manmeri mas putim gras bilong pisin o skin bilong wail-laip insait long klin-pela kontena o bokis.

Haitim long san

Namba tri rot WCS i laikim em ol manmeri i mas putim pisin gras o wail-laip skin long ples tudak olgeta taim. Taim ol manmeri i no yusim pisin gras o skin bilong wail-laip, ol i mas putim ol long ples hait o ples tudak. Strong bilong lait bilong san i ken rausim kata bilong pisin gras o skin bilong wail-laip.

Rausim binatang

Namba 4 rot WCS i laikim ol manmeri i mekim em ol i mas rausim binatang long pisin gras na wail-laip skin. Ol liklik binating bai kaikai skin gras na skin bilong wail-laip olsem na em i moa gutpela long putim ol insait long wanpela kontena. Dispela bai no inap larim ol binatang long go insait. Ol manmeri i mas putim wanpela o tupela mot-bols insait long kontena. Dispela bai mekim na ol binatang bai i no inap go insait long bagarapim ol dispela gras bilong pisin na skin bilong wail-laip. Dispela marasin ol i kolim 'naphthalene' o 'paradischlorobenzene' i strong na ol binatang bai no inap go insait long bagarapim ol dispela bilas. Dispela ol mot-bols i no dia tumas. Ol manmeri husat i gat ol bilas i ken baim ol dispela mot-bols marasin insait long wanpela paket we 20-pela i save stap insait long liklik prais tasol em mak bilong en i daunbilo long K2.

ITAMBU!

Dispela ol marasin i gat poisen. Putim ol marasin longwe long ol liklik pikinini we ol bai noken lukim na kaikai.

Sekim gut

Namba-5 rot ol lain WCS i

laikim ol manmeri i mas bihainim em olsem ol i mas sekim gut ol pisin gras na skin bilong wail-laip na ol i mas noken bagarap. Sampela taim ol manmeri i mas sekim pisin gras na skin bilong wail-laip long sain bilong binatang, olsem tit-mak long pisin gras o skin bilong wail laip na tu i mas nogat das long dispela ol samting. Ol i tok tu olsem sampela ol marasin olsem Mortein i ken kilim ol binatang. Tasol ol manmeri mas noken spreim stret long ol pisin gras o skin bilong wail-laip. Ol i ken kilim ol binatang sapos ol i putim ol dispela pisin gras o wail-laip insait long bokis-ais inap long sampela de. Sapos nogat marasin o ais-bokis ol manmeri i ken yusim hat bilong paia o lam long kilim indai ol liklik binatang long ol pisin-gras na skin bilong wail-laip. Sapos ol manmeri i givim planti hot bilong paia ol i ken bagarapim pisin gras o wail-laip skin. Hot bilong paia o lam i noken hot tumas.

Yusim wan wan taim tasol

Namba 6 rot ol lain WCS em olsem ol manmeri i mas sevim ol dispela spesel pisin gras na skin bilong wail-laip long ol spesel de o bikpela bung tasol. Ol i noken yusim nating nating. Sapos ol i holim ol dispela bilas nating nating, ol bai bagarapim ol dispela bilas na ol kala bilong ol bai lus hariap.

Planti bilong ol dispela bilas em hat tru long painim na em i moa gutpela sapos ol i lukautim ol dispela bilas gut na noken stap longpela taim tumas.

Mis Supuma i tok olsem sapos ol manmeri i lukautim gut ol pisin gras bilong ol na skin bilong wail-laip, ol bai stap yet longpela taim ol bai luk gut olsem nambawan taim ol i kisim.

"Sapos ol manmeri i lukautim gut ol pisin gras na ol wail-laip skin ol tumbuna bilong ol bai yusim yet dispela ol bilas na ol bai amamas long yusim samting bilong ol tumbuna bilong ol."



GURIA LONG KISIM PIKSA: Kain kain gras bilong pisin em sampela i no save lukim em ol lain long ples i gat na dispela i save mekim ol saveman i guria stret.




TINGIM BIHAIN TAIM: Yangpela baiolojis bilong WCS, MIRIAM SUPUMA i givim aut ol mot-bols long wanpela singsing grup bilong Simbu long Goroka So long las wiken.



PISIN GRAS BILAS I STAIL MOA: Sampela naispela bilas ol i wokim long pisin-gras we i ken stap long taim sapos ol manmeri i lukautim gut.

©Foto: JAMES KILA

Timothy Nakon kam bek gen



TIMOTHY NAKON: Hatwok bilong em karim kaikai wantaim namba tri albam.

DISPELA nem Timothy Nakon, klostu tru em bai lus nating long stori bilong bipo insait long musik industri bilong PNG. Tasol nogat tru. Nau dispela man nogut bilong Ambunti long Is Sepik provins i kam bek pinis long pairapim PNG musik wantaim stail bilong em yet.

Tim i bin lus na tru tumas, ol lain manmeri husat i bin skin kirap tru long tupela singsing bilong em Sikin Buai na Doctor Boy i mas paul olgeta.

Tasol em i no lus nating. Bihain long albam bilong em i bin kamaut long 1992, em i no bin mekim nem inap long em pairap strong insait long PNG musik.

Timothy Yet i tok olsem dispela tupela singsing we ol manmeri i bin laikim, i no bin gat inap strong long holim em i stap antap.

"Tru tumas, namba wan albam bilong mi i no bin gutpela tumas. Em i bagarap olgeta na i karim bikpela hevi tru long maket. Mi yet mi bin rong," Timothy i tokim mi.

"Nau mi luksave pinis olsem mi bin hariap tumas na mi no bin isi long skelim gut musik na mekim gutpela singsing."

Em yet i bin bilip olsem em i bin kamap wanpela biknem musik man pinis taim em i kisim sans long rekot wantaim Supasaun Studios, na em i bungim ol singsing tasol, em i no harim stia tok bilong ol arapela man, na em i go insait long studio na rekotim ol singsing bilong em.

Bikpela bilip tru

Ai bilong Nakon i bin pas taim em i kirap nogut long nem bilong em taim em i rausim namba wan albam bilong em we em i bin bilip olsem dispela wanpela albam bai apim nem bilong dispela manki Beglam.

Nem bilong namba wan albam bilong em, 'Timothy Nakon' yet na em i bin namba wan taim nem bilong em i pairap insait long PNG musik industri. Em i bin kisim samting olsem 6-pela yia bilong skelim tru hevi dispela namba wan albam i givim long em.

Em i bin rekodim namba tu albam bilong em long 1998 long Allan Saun Studios bilong Thomas Lulungan long Is Nu Briten.

Lulungan yet i bin luksave long hevi namba wan albam bilong Nakon i bin kamapim, olsem na



em i hat wok tru long strongim dispela namba tu albam bilong em.

Sampela wik i lus na nakon i painim wanpela singsing bilong wanpela bipo string ben Biamo Drifters, Sikin Buai. Tupela wik bihain, narapela singsing bilong Timothy, Doctor Boy i kam sindaun antap long kaun daun.

Tasol nem nogut em i bin kisim long namba wan albam bilong em i bin strong yet na namba tu albam bilong em tu i no karim gutpela kaikai.

Mekim kain kain wok musik

Mi yet tu mi bin ting em bai lusim musik olgeta long 1998. Ol musik bilong em i no bin i gat inap manmeri i laik harim.

Timothy yet i bin gat bikpela bel hevi tru long tupela albam bilong em. Em i stat long mekim ol liklik wok, wanpela gig o pilai musik long wanpela hap, pilai musik long ol bikpela bung bilong ol skul, na helpim ol arapela biknem musik atis husat i askim em long helpim ol.

Em, i bin apim han long helpim wanpela pilai raun long Wewak bilong Saugas husat i bin pilai long Windjama Bis Hotel na long Moem Bareks. Em i bin pilai wantaim CHM Supa ben long rekodim albam PNG Fresh Hits.

Go bek long ples ben

Long 2000, Tim i go bek long bipo ben bilong em long Ambunti, nem bilong ol Waksa long rekodim wanpela albam wantaim GMA Studios long Pot Mosbi.

GMA i bin opim rot bilong Waksa long pilai long wanpela string ben resis we ol i bin winim luksave.

Timothy yet i lukim olsem dispela bai stat bilong gutpela taim bilong ol nau.

Em i tingim yet olsem em i bin go bungim Waksa ben bilong wanpela rekoding sesen long Walter Bay Studios long Pot Mosbi long 1997, wanpela yia pastaim long namba tu albam bilong em i kamaut. Em nau, em i lukim Waksa olsem rot bilong em long go long go bek insait long musik industri long kantri.

Tru tumas, mi no inap daunim ol manmeri bilong hat wok na traim ol samting. Timothy em dispela kain man. Em bai traim tasol. Mi givim luksave long en long dispela as.

Nau gen, Timothy i traim long mekim nem bilong em long sait bilong musik.

Traim gen

Nau Timothy i wok hat tru long dispela namba tri albam bilong em.

Em i kisim tok orait i kam long ol pipel bilong em long Beglam Viles nem na em i karim Biamo, wanpela masalai bilong Wara Gava long helpim em long mekim musik bilong em bai em i ken i gat nem long musik bilong kantri tu.

Musik bilong Timothy we nau i kamaut pinis em ol singsing na musik em i stretim long 6-pela kris-mas i go pinis.

Albam namba tri

Namba tri albam bilong Timothy, nem bilong em Traim Tasol. Dispela albam i sut long taim bilong traim bilong em insait long PNG musik industri. Nau em i tok bikpela bilip i stap olsem dispela nupela albam bilong em bai i gat inap strong long mekim nem bilong em insait long PNG musik.

Na mi ken tok olsem ol singsing long Traim Tasol i winim ol singsing na musik bilong em long bipo na dispela albam i gat sampela gutpela singsing we bai i kraik gut tru long yau bilong yu.

"Namba tri albam bilong mi i karim tu nek bilong Harry Herman, wanpela gutpela poroman bilong mi husat i gat nem long musik long Sepik tu. Em yet i givim 6-pela singsing," Tim i stori. "Na em i wanpela hap man bilong musik tu ya."

Ol singsing bilong Harry Herman inapim hap bilong olgeta singsing long albam olsem Manage Waran, PS Lokol Turis, Kambie, Pes Blong Grup, Simel Purpur na Ama Lakwa. Na em yet i singsing long olgeta dispela singsing.

"Olgeta dispela singsing em ol naispela singsing na mi ting olsem mi givim inap luksave long poroman bilong mi."

ti i rekodim dispela namba tri albam bilong em long mun Oktoba 2003 na CHM i no bin rilisim i kam inap mun Julai bilong dispela yia.

"Tasol mi amamas long ol rekoding bilong mi, long wanem wanpela PNG musik aidol blong mi, Patti Doi i bin givim mi gutpela stia tok long helpim wantaim albam bilong mi."

Strong bilong Traim Tasol

Timothy i tok namba wan singsing long albam, Manage Waran bai wanpela bikpela singsing long wanem em i stori long pasin bilong marit long ples we tupela pisin i senisim ol meri bilong marit. Wanpela vidio klip bilong en we ol i mekim antap long ol maunten bilong ples Sogeri i kamap pinis na i wok long kamap long EMTV.

"Wanpela arapela singsing we mi ting bai i gat nem em Sori Kiri, long tok pisin em tupela meri laibu

long Sauten Hailans i bin raitim. Em i wanpela gutpela singsing tru na mi bin laik wok wantaim long givim nupela kain stail long en. Olsem na mi askim Remo Kiki bilong ples Paramana long tanim sampela toktok bilong singsing i go long tok ples Aroma. Oloman, nau dispela singsing i paia nogut tru."

Remo em i pikinini bilong Kii Geno, biknem musik man bilong Paramana Strangers.

I gat ol arapela singsing bilong strongim wok lokol turisim olsem PS Local Tourist, na Windjamah Beach we i singsing na apim nem bilong Wewak na Is Sepik provins.

"Insait long tripela ten krismas i go pinis, mipela i givim PNG namba wan praim minista, na tupela moa taim ol Sepik minista na ol arapela biknem man na mipela laik stori long ol dispela samting bai ol arapela manmeri bai save long en."

Timothy i gat tingting long ol lo bilong kopirait o lo bilong banisim ol musik atis na ol musik na singsing bilong ol. Em i tok em i no klia gut long dispela lo.

"Sapos ol dispela lo i mas banisim ol musik atis, ol i mas mekim dispela. Mi yet mi ting olsem plan-ti musik atis insait long kantri i no kisim gutpela samting long ol studio na ol i no mekim mani ol i mas mekim long musik bilong ol," em i tok.

Em i tingting bilong em long ol biknem musik man olsem Patti Doi na John Wong na ol arapela musik atis i mas go pas long kamapim wanpela kain musik asosiesen bai ol musik atis i ken kisim sampela kain banis long ol musik bilong ol.

****Yu ken ridim ol stori blong Musik olgeta Mande insait tasol long The National**



Laikim Penpren

Nem: Ezra Akia Arua
 Krismas: 21 (man)
 Adres: C/- Student Services, PO Box 320, University PO, NCD
 Save laikim: Stadi, ridim buk na raitim pas.

Nem: Rubby Mea
 Krismas: 11 (meri)
 Adres: Mt Zion Church, PO Box 3512, Boroko, NCD
 Save laikim: Lotu, pilai spot, waswas, ritim buk, go long skul, lukim ples na senisim poto.

Nem: Jack Esinu
 Krismas: 21 (man)
 Adres: PO Box 2294, Lae, Morobe Province
 Save laikim: Pilai soka, basketbol, volibol, go waswas long wara, tok pilai, ritim buk, pilai gita na singim olotu song na go lotu long Sande.

Nem: Eunice Yawi
 Krismas: 16 (meri)
 Adres: Mercy Secondary School, PO Box 580, Wewak, East Sepik Province
 Save laikim: Pilai soka, basketbol, pilai gita, lukim ragbi lig long TV.

Nem: David John
 Krismas: 19 (man)
 Adres: Mainland Holdings Crocodile Farm, PO Box 196, Lae, Morobe Province
 Save laikim: Raun long kar, baisikol, sip, balus na tok pilai na rait long penpren.

Nem: Luther Raemeng
 Krismas: 18 (man)
 Adres: C/- Malahang Technical High School, PO Box 1401, Lae, Morobe Province
 Save laikim: Stadi, go lotu, tok pilai na senisim presen na poto.

Nem: Paul L. Kelly
 Krismas: 30 (man)
 Adres: Assets Limited, PO Box 71, Lihir Island, New Ireland Province
 Save laikim: Wokim wok didiman, raitim pas na tok pilai.

Nem: Jereth Ilerata
 Krismas: 29 (man)
 Adres: Kambubu Adventist Secondary School, PO Box 421, Kokopo, East New Britain Province
 Save laikim: Harim singsing kwaia, go lotu long Sabat na pilai ragbi.

Nem: Leeza Borai
 Krismas: 19 (meri)
 Adres: Sangara Vocational Centre, PO Box 120, Popondetta, Oro Province
 Save laikim: Kukim kaikai, raitim pas, senisim poto, tok pilai, pilai volibol, soka na harim musik.

Nem: Olga Kaggane
 Krismas: 16 (meri)
 Adres: Sangara Vocational Centre, PO Box 120, Popondetta, Oro Province
 Save laikim: Pilai ragbi tas, harim musik, raun wantaim ol pren, raitim pas na tok pilai.



STORI TUMBUNA

BIPO, bipo tru wanpela man na meri i marit na i stap. Na tupela i gat wanpela pikinini tasol. Long taim meri i save go long gaden, em i save kisim pikinini i go wantaim em.

Taim tupela i kamap long gaden, meri ya i no save givim susu long pikinini pastaim na bihain i go wok long gaden. Nogat. Em i save go stret na wok long gaden. Na taim pikinini i hangre, em i save kra.

Meri ya i save harim, tasol em i no save kam kwiktaim na givim susu long pikinini.

Nogat. Em i save wok tasol na i stap. Em i save tok olsem, yu save wok long gaden tu a? Meri i tok olsem, na trangu pikinini i kra yet na klostu nek bilong em i laik pas. Nau i save kam long givim susu long em. Na taim em i givim susu pinis, em i save paitim em gen.

Meri ya i save mekim olsem olgeta taim long pikinini bilong em. Wanpela taim, tupela i go gen long gaden na man bilong em i go long bus na painim abus. Na taim meri i kisim pikinini i go, em i mekim wankain pasin nogut long em long gaden. Olsem na taim pikinini i wok long kra yet, skin bilong em i senis na tanim olsem pisin ya ol i kolim Koki.

Olgeta skin bilong em i kamap olsem gras bilong koki, tasol maus tasol i no tanim yet

Pikim taim koki



olsem koki. Na bihain em i plai i go antap long rop bilong mami na yam na em i singautim mama bilong em. Em i tok, 'mama yu lukim mi'. Na mama bilong em i tanim, em i lukim koki tasol, na em i no lukim pikinini bilong em.

Mama ya i kirap na stat long kra long pikinini bilong em. Na pikinini ya i kirap tokim mama bilong em olsem, 'mama bilong mi, em i orait, susu bilong yu i stap, bihain orait yu ken givim long narapela pikinini. Mi no pikinini bilong yu tru olsem na

yu save oltaim mekim dispela pasin nogut long mi.'

Nau mama bilong em i kra nogut tru, na em i traim long holimpas koki em i tanim olgeta olsem koki na plai i go olgeta long bik bus tru. Em i singaut olsem pisin koki tru na plai i go olgeta.

Long taim em i singaut olsem koki, papa bilong em i wok long bihainim ol abus. Em i harim singaut na em i tingting, hei wanem kain pisin tru ya?

Em i harim olsem na em i pret nogut tru. Olsem na em i

ranawe i go bek long ples. Na taim em i kamap, em i lukim na harim meri bilong em i kra i stap. Na em i kam na askim em. 'Yu kra long wanem tru?' Na meri ya i tokim em long olgeta stori.

Na man i harim olsem na em tu i kirap na stat long kra i go na tupela dai insait long haus. Na tupela i tanim olsem "Womponko Ston".

STORI I KAM LONG DREIKIKIR, ERIA IS SEPIK PROVIN

Mi gat wari bikos mi no wok na mi laikim helpim

Mi gat wari long pren wantaim marit man na mi laikim helpim. Mi wanpela meri i gat 20 krismas pinis. Ol Wantok bilong mi i kros long wanem ol i painaut osem mi raun wantaim wanpela marit man. Ol i tok mi mas pinis wantaim em Tasol em i tok em i laikim mi. Na mi tu mi laikim em. Em i no laikim meri bilong em. Em i tok meri i trikim em. Em i kisim bel na nau mn i mas lukautim em na pikinini. Em bai salim meri i go bek long ples. Na em i laik bai mi go stap wantaim em. I tru mi laikim em. Tasol mi no laik sakim tok bilong ol Wantok na mi laik pinis wantaim dispela man. Tasol bai mi mekim wanem? Mi no laik mekim em i bel nogut. Mitupela i wok long wanpela opis na mi save lukim em long olgeta de. Bai mi mekim wanem?

Help Needed

Dia pren
 Mi sori long yu. Tasol mi ting ol Wantok bilong yu i gat gutpela tingting na olsem, ol i tambuim yu long raun wantaim marit man Na wanpela samting i mekim mi



belgut, em dispela tok bilong yu: Yu laik pinis wantaim man ya tasol yu no save olsem wanem.

Sapos yu laikim wanpela man, em i no isi long bihainim stretpela pasin olgeta taim. Tingting i save paul.

Na sapos yu mas pinis wantaim em, yes, em i tru., bai em i bel kaskas long dispela. Tasol yu yet i mas strong. Yu mas tingting long sampela arapela samting- nau em yet i no tingting long em.

Yu ting long meri bilong em. Pasin bilong man ya i mekim meri ya i bel kaskas tru. Yu lukim,meri ya em i meri tru bilong dispela man. Na meri ya i wetim pikinini bilong dispela man. Na taim meri ya i karim pinis, man ya i laik lusim em na kam long yu, yu ting em i no bel nogut,a? Olsem, yu no mas wari long mekim man i bel nogut. Maski, yu mas wari long yu i no mekim meri

bilong em i bel nogut.

Sapos pren bilong yu i tok meri ya i trikim em, em i giaman. Givim bel na kisim bel.....em i samting bilong man tupela meri wantaim. Em i samting bilong tupela pipel na i no samting bilong wanpela tasol. Man ya i save pinis long taim em i prenim dispela meri. Na taim em i laik pilai wantaim meri ya. Ating em i gris tu long em i laikim em.....wankain olsem em i tokim yu nau.

Harim. Sapos dispela man i rausim nupela meri bilong em, i gat wanpela de em inap mekim wankain long yu.....sapos em i lukim narapela naispela meri.

Yes, em i no isi long pinis wantaim em sapos yutupela i wok long wanpela opis tasol. Na yu save lukim em olgeta de. Orait, sapos yu no inap long tokim em stret, yu ken traim long painim wok long narapela opis o ples.

Sapos bel bilong yu i malumalu na yu ino inap long tok stret na strong long em, yu ken traim long raitim wanpela pas i go long em. Em i pasin bilong planti pipel long PNG. Yu ken tokim em; yu laikim em tasol famili bilong yu i putim tambu long yu i prenim em. Na tokim em tu olsem sapos yu maritim em, bai yu mekim nogut long meri na pikinini bilong em wantaim. Olsem

na i moabeta yutupela i pinis nau. Na yu tokim em tu nau. Na yu tokim em tu olsem yu no ken tok-tok wantaim em moa ausait long opis. Sapos em i gat tok long wok insait long opis, em i orait.

Narapela trik em dispela, wanpela Wantok em kandere o brata samting i ken bungim yu bihain long wok, na wokabaut wantaim yu i go bek long haus. Olsem na man ya i no inap poromanim yu....

Sapos yu pinis wantaim dispela man, i no long taim bai yu painim sampela arapela pren namel long ol pipel. Na ating, bihain long sampela taim, bai yu laikim wanpela man em ol Wantok tu i laikim. Na ol samting bai orait na irap ran gut.

Na sapos yu mekim olsem long dispela man, stretpela tingting bilong yu yu inap long tanim bel bilong em. Na em inap long go bek sindaun gut wantaim meri na pikinini bilong em na lukautim tupela gut, olsem gutpela marit man na papa i mas mekim.

Mi pre bai yu ken bihainim kisim strong long bihainim tingting bilong ol wantok bilong yu. Na mi pre tu bai ol dispela man i stretim tingting bilong em na painim gutpela sindaun inap long taim wantaim meri na pikinini bilong em.

'Prait ov PNG' kopi teistim resis kamap long Goroka

James Kila i raitim

WANPELA bikipela intanesenel kopi resis wantaim het tok 'Prait ov PNG' we i pulim sampela long ol biknem savemanmeri long teistim o traim kopi kamap long Goroka long dispela wik.

Namba wan intanesenel resis olsem insait long PNG na Esia Pasifik rijen bai makim ol smol holda kopi we ol bai traim na skelim strong bilong wan wan kain kopi. Dispela bikipela resis em PNG Kopi Groas Federesen (PNGCGF) na Kopi Pasifika i go pas long en. Em bai pinis tumora (Fraide).

PNGCGF na Coffee Pasifika em tupela kampani i rejista long PNG na long Amerika tu. Ol memba bilong ol em ol smol holda kopi kopretiv i stap

nabaut long kantri.

Ol lain i go pas long dispela resis insait long kantri i tok ol i laik strongim dispela tingting "Long diwai i go long kap' we ol smolholda kopi fama long PNG i ken salim kopi bilong ol i go stret long ol rosta na baia insait long wol kopi bisnis.

Ol saveman bilong traim kopi husat i kamap insait long kantri bilong dispela resis i kam long Amerika, Netalens, Itali, Nu Silan na Australia. Tupela saveman bilong Kopi Industri Koporesen na bipo sief testing man bilong CIC yet, David Rumberumba i stap insait long resis tu.

Het jas bilong dispela resis em Willem Boot na Andi Trindle Walker husat i gat nem namel long ol kopi rosta na bisnisman insait long wol.

Ekting Sekretri bilong Dipatmen bilong Agrikalsa na Laipstok, Anthony Benjamin i bin opim dispela resis. Ol arapela bikman i stap long opim bilong resis em Sekretri bilong Tred na Industri Alois Tabareng na Ekting Sief Eksekutiv bilong Kopi Industri Koporesen Ricky Mitio.

Mista Benjamin i givim bikipela luksave long PNG Kopi Groas Federesen na siaman bilong ol John Yogiyo long go pas long dispela wok long helpim ol smolholda kopi fama insait long kantri.

Em i tok gavman i luksave long bikipela wok PNGCGF i givim long sapos bilong em long wanem em i bihainim Somare-Avei Ekspot Driven Ikonmik Rikavri polisi.

Resis i gat moa long 200 kopi long traim we

ol i bihainim ol eliminesen o rausim raun long ol jas las wik.

Mista Mitio i tok olsem arensimen bilong PNGCGF i bihainim nupela CIC 8 poin as wok bilong strongim ol groa maket sistem.

"Dispela em i nupela samting we i no bir save kamap bipo," Mista Yogiyo i tok. "Yu mas amamas olsem yupela i no inap sanap na lukluk tasol."

Ol lain i go pas long dispela resis i tokim Wantok Niuspepa olsem dispela bai apim nem bilong ol smolholda PSC o Y-gred kopi insait long ol intanesenel maket, husat i save kam bihain long ol plantesen gred kopi.

Ol fama i makim Morobe, Westen Hailans, Simbu na Isten Hailans i bin kamap long Goroka long lukim dispela intanesenel resis.




TOK KLIA: Het Jas bilong kopi traim resis Willem Boot i tok klia long ol rot bilong jasim na skelim gut ol kopi long ol arapela jas.



Bisnis bilong Groim Diwai insait long PNG - Planim diwai long ol renfores erta

Rot bilong groim ol spisis diwai i save groa insait long PNG

Canarium indicum (red canarium, galip)



Nem bilong en: ret kanarium o galip

Ples we em i save groa: Canarium i gat samting olsem 100 spisis long Afrika, Esia, Malaysia, Australia, na ol Pasifik Ailans. I gat samting olsem 20 spisis bilong canarium insait long PNG. C. indicum i go aut long Indonesia, insait long PNG na i go olsem long Solomon Ailans na i go long Vanuatu.

Canarium i save gro gut insait long ol renfores i stap long ples daun, na i save gro gut insait long ol bipo ples gaden na raunim ol ples long Nu Briten we prut bilong em i save kisim bikipela mani mak. Maski em i save gro long ples daun, yu ken painim long ples i stap samting olsem 1000 mita antap long mak bilong solwara.

Wanem kain diwai: Canarium em i wanpela namel i go inap bikipela diwai we longpela bilong em inap long 40 mita. Namel bikipela han bilong em i sot na i save gro inap 10 mita na bikipela bilong em i ken go inap namel long 60 na 100 sentimita. Ol plaua bilong em i save gro wan wan

na i bikipela. Prut bilong em i longpela na 5 sentimita na namel bilong prut inap long 2 na 2.5 sentimita. Insait em i wanpela bikipela strong i gat tripela hap bilong em. Wan wan long ol dispela hap i gat bikipela namel bilong em we ol manmeri i save kaikai. Prut i save tanim kala pepel bilak taim em i mau olgeta.

Rot bilong yusim: Long PNG, prut bilong em i gutpela long kaikai na wei bilong em i ken senisim wei bilong kokonas tu. Diwai bilong em yu ken yusim long mekim haus, insait long haus, ol bokis, sia na tebol na mekim ol kabot samting. Em i gutpela diwai bilong paiawut tu.


Bungim ol sid na stretim: Yu ken kisim ol sid long graun o yu ken kalapim diwai na rausim prut na pikinini bilong em. Yu ken rausim ausait skin bilong sid wantaim han bilong yu.

Wok Neseri: Yu ken planim Galip sid i go stret insait long ol namel sais polibek o planim insait long graun. Yu mas planim i go insait long graun inap long 3 o 4 sentimita.

McCARTHY & ASSOCIATES (FORESTRY) PTY. LTD.
National & International Forest Consultants
mccaf@datec.net.pg

"Long kisim tok stia long olgeta wok diwai"

Cat® 12H Motor Grader



blends productivity and durability to give you the best return on investment.

Matched and balanced components.

The Cat® C9 engine, direct-drive power shift transmission and load-sensing hydraulics are designed to work together to deliver top productivity in all applications.

Superior visibility, control layout and operating ease.

The operator is the single most important factor in maintaining high productivity throughout the work day. By offering the best operator's station in the industry, Caterpillar® helps operators achieve peak performance.

Serviceability.

Caterpillar® re-engineered inspection and service points, are grouped into a convenient ground level 'service centre' which helps to minimise downtime.

Hastings Deering



PORT MORESBY

Spring Garden Road, Hohola, PNG
Ph: (675) 300 8300 - Fax: (675) 325 0141

	PHONE	FAX
LAE	472 2355	472 1477
TABUBIL	548 9162	548 9155
RABAUL	982 1244	982 1129
LIHIR	986 4105	986 4107
KIMBE	983 5144	983 5144

Product People Commitment.

We deliver.



PACIFIC BEAT

PNG tok welkam long sapot bilong ol Australia fama

PAPUA Niugini i welkamim sapot we ol Nesenel Famas Federesen bilong Australia i givim long long wanpela skim o plen, sapos ol i oraitim na go hetim, bai larim ol lain bilong narapela kantri i go wok long sotpela taim long Australia.

Dispela tingting i kamap bihainim sot long ol woklain, moa yet, long ol rurel eria taim ol wok i kamap long ol sisen. Tasol Yunien woklain bilong Australia i tok dispela plen inap long kamapim sampela hevi long ol woklain bilong ol narapela kantri, bai em i hat long ol polis na dispela bai mekim planti Australia i nogat wok na Gavman bilong Australia i no givim tok orait bilong em long dispela skim.

Husat i Askim: Caroline Tiriman
Husat i Bekim: Sir Rabbie Namaliu, Foren Afeas Minista bilong PNG

TIRIMAN: Foren Afeas Minista bilong PNG, Sir Rabbie Namaliu i amamas long dispela na em i sapotim dispela skim. Em i hop Gavman bilong Australia bai lukluk gut long dispela skim..

NAMALIU: Mi welkamim sapot we Nesenel Famas Asosiesen (NFA) bilong Australia i givim long singaut, bikos em

ol yet bai kisim hevi taim ol i sot long ol wokman. Na sampela memba bilong ol i wok long toktok long ol Konsol Jenerel long Brisben long dispela plen. Ol inap long mekim, tasol Komonwel Gavman i mas tok oraitim pastaim dispela plen bipo ol i go hetim.

Bai mipela i lukluk long dispela long anuel bailaterel Ministeriel forum long Disemba taim mipela i bung long Australia.

TIRIMAN: Senet komiti bilong Australia i wanbel wantaim ripot. Komiti ya i save monitaim na glasim wok pren namel long Australia na Pasifik, we PNG i wanpela long ol.

Tasol i kam inap long nau, gavman bilong Australia i no givim tumas sapot long ol ripot i sut long dispela samting. Mi askim Sir Rabbie watpo em i bilip Australia bai komitim em yet long dispela tingting.

NAMALIU: As tingting we ol bin givim long mipela em, ol i wari nogut sampela bilong ol i stap bek abrusim taim bilong ol sapos ol i larim dispela plen i go het. Na mi tok olsem sapos ol i glasim gut ol lain i save abrusim taim na stap bek long Australia, rekot bilong PNG i gutpela Mipela i gat gutpela rekot long ol pipel bilong yumi i stap long Australia na

ol i no abrusim taim, olsem planti bilong ol pipel i kam long ol arapela kantri i wokim.

Na sapos yumi glasim piksa long ol sumatin bilong yumi i go skul long Australia, yu save, liklik lain tasol, bihain ol i pinisim skul i save stap bek long Australia bikos ol i gat tingting olsem ol i mas kam bek na wokim kontribusen bilong ol. Na dispela em i wanpela strongpela poin.

TIRIMAN: Sir Rabbie i tok sapos ol i givim rait long karimaut wok insait long Australia long sotpela taim, em bai moa gutpela long dairek helpim we Australia i save givim long PNG.

NAMALIU: Sapos ol i glasim mipela long abrusim taim bilong mipela long stap long Australia long ol arapela kantri long Yurop, rekot bilong PNG em i gutpela.

Yu save, yumi save tok tsim yumi tok tenkyu Australia long helpim mani em i save givim PNG long en, yumi laikim moa yet, wok tred bikos em i gutpela winim helpim mani.

Na long hlarim ol pipel bilong yumi i go wok long liklik taim long Australia, em i givim ol sans long wok na kisim mani long servis ol i givim long em.

WOL NIUS

Namba 5 man i dai long pisin sik long Indonesia

WANPELA meri i dai ken long bird flu virus long Indonesia. Em i kamap namba-5 namel long ol pipal i dai pinis long Indonesia long H-5-N-1 strain blong bird flu virus, em i ken kilim man hariap. Niusman Tim Palmer i ripot olsem, man i dai nau tasol em long Jakarta, na dai blong em i kamap taim oli klarim pinis ol narapela man na meri husat oli ting i bin gat dispela bird flu virus. Jakarta meri ia, krismas blong en 27, i bin dai long haus sik tede long morning, 36-awa bihain long ol dokta i bin toksave olsem, tru tumas em i gat dispela H-5-N-1 bird flu. Ol i save olsem, dispela meri i bin wok long lukautim ol kakaruk na sampela long ol kakaruk blong em i bin dai ino long taim igo pinis. Em i namba-5 long dai long Indonesia long bird flu, olketa i dai insait long Jakarta stat long mun Julai ikam inap nau. Wanpela narapela sikman, namel long sampela oli bin salim long haus sik long wik i pinis blong testim ol, i soim olsem, em tu i gat dispela virus, tasol em i wok long kamap orait. Tupela narapela pikinini husat i bin dai long wik i pinis, em oli ting i bin gat bird flu, nau oli painim aut olsem, wanpela i bin dai long measles na narapela i bin dai long wanpela kain sik numonia.

Australia i givim moa mani blong helpim Indonesia i redi long pisin sik

Australia i givim moa moni blong halvim Indonesia i redi gut long kamap blong bird flu epidemic. Wanpela meri, krismas 27, i bin dai long Jakarta. Ol i ting em i dai long sik oli kolim - avian influenza. Em i dai bihain long faipela (5) narapela pipal tu i bin dai long Indonesia long wanpela nogut virus. Australia Federel Gavman i toksave olsem, em bai givim Indonesia mani blong narapela 40-tausen raun blong Tamiflu, marasin blong pasim ol kain nogut virus. Em antap long ten-tausen raun em Australia i bin promis pinis long givim Indonesia long las wik. Dispela marasin bai kam long World Health Organisation, na nambawan long en bai kamap sampela taim dispela wik. Australia Foran Minista, Alexander Downer i tok dispela bai halvim Indonesia long redi gut long taim we dispela virus i ken senis igo long narapela samting, na stat kalap long pipal.

RADIO TOK PISIN PROGRAM TUNE IN: 101.9 FM

Radio Australia Tok Pisin Program - stat long mun Mas 2005

MANDE Morning	6AM Stesen Op - Nius Hetlain - Musik na ol intaviu
6.30AM Nius na Karent Afeas	7AM Stesen Pas
Nait	7PM Stesen Op
7.01PM Ol Hetlain na Program Priviu	7.15PM Musik na Chit-Chat
7.30PM Nius na Karen Afeas	8PM Helt
8.15PM Musik	8.30PM NIUS
8.40PM Spots Riplei	8.55PM Musik
9PM Stesen Pas	
TUNDE Morning	6AM Stesen Op - Nius Hetlain - Musik na ol intaviu
6.30AM Nius na Karent Afeas	7AM Stesen Pas
Nait	7PM Stesen Op
7.01PM Ol Hetlain na Program Priviu	7.15PM Musik na Chit-Chat
7.30PM Nius na Karen Afeas	8PM Mama Graun
8.15PM Musik/Spots	8.30PM NIUS
8.40PM Helt Riplei	8.55PM Musik
9PM Stesen Pas	
TRINDE Morning	6AM Stesen Op - Nius Hetlain - Musik na ol intaviu
6.30AM Nius na Karent Afeas	7AM Stesen Pas
Nait	7PM Stesen Op
7.01PM Ol Hetlain na Program Priviu	7.15PM Musik na Chit-Chat
7.30PM Nius na Karen Afeas	8PM Focus
8.15PM Musik/Spots	8.30PM NIUS
8.40PM Mama Graun Riplei	8.55PM Musik
9PM Stesen Pas	
FONDE Morning	6AM Stesen Op - Nius Hetlain - Musik na ol intaviu
6.30AM Nius na Karent Afeas	7AM Stesen Pas
Nait	7PM Stesen Op
7.01PM Ol Hetlain na Program Priviu	7.15PM Musik na Chit-Chat
7.30PM Nius na Karen Afeas	8PM Youth
8.15PM Musik/Spots	8.30PM NIUS
8.40PM Focus Riplei	8.55PM Musik
9PM Stesen Pas	
FRAIDE Morning	6AM Stesen Op - Nius Hetlain - Musik na ol intaviu
6.30AM Nius na Karent Afeas	7AM Stesen Pas
Nait	7PM Stesen Op
7.01PM Ol Hetlain na Program Priviu	7.15PM Musik na Chit-Chat
7.30PM Nius na Karen Afeas	8PM Wantok
8.15PM Musik	8.30PM NIUS
8.40PM Youth Riplei	8.55PM Musik
9PM Stesen Pas	
SARERE	Nait
7PM Stesen op - Ol Nius Hetlain/Program Priviu	7.05PM Musik na Chit Chat
7.30PM Nius	7.40PM Wantok
8PM Lokal Ben	8.30PM Nius
8.40PM Musik/Chit Chat	9PM Stesen Pas
SANDE	Nait
7PM Stesen op - Ol Nius Hetlain/Program Priviu	7.05PM Musik na Chit Chat
7.30PM Nius	7.40PM Famili Blong Serah (Radio Plei)
8PM Lukluk Bek Long Wik	8.30PM Nius
8.40PM Musik/Chit Chat	9PM Stesen Pas

TOKSAVE YU KEN HARIM RADIO AUSTRALIA TOK INGLIS LONG 7 DE LONG WAN WIK

Pacific BEAT

Listen to Radio Australia 101.9FM Port Moresby

4, 5, 6am & 4pm, 5pm including sport

Radio Australia current affairs programme which focuses on island nations. bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.

NEW ERIMA SPOT

Sarere Oktoba 01, 2005
man tas ragbi

09:00 Boom Gate Jets vs Katimo
09:50 Wild Cats vs 5 Mile Crushers
10:40 Swamp Eels vs Loose Pallets

11:30 Megusa vs 5 Mile Animals
12:20 B/Panthers vs Taxi Base
1:10 Neggie Dogs vs Jiwaka Kongos
2:00 JS Warriors vs FMT Slaves

Sande Oktoba 02, 2005
man tas ragbi

09:00 289 Top Street vs NYC Fire Safe
09:50 Golf Spiders vs 21 Red Heads
10:40 Out Cast vs S/Sons
11:30 M/Stones vs M/R Crocks
12:20 Flames vs Mt Eagles
1:10 M/Cowboys vs Mad Dogs
2:00 T/T Casino vs C/Blues
2:50 H/Crocks vs G/W Rabbitohs
3:40 S/Stones vs K Roosters
4:30 BO Hunters vs I/C Dragons

meri soka

10:00 Jiwaka Kongos vs Megusa
10:50 5 Mile Crushers vs Nane Tigers
11:40 289 Top Street vs Taxi Base
12:30 NYC Fire Safe vs I/C Dragons

1:20 BO Hunters vs Mt Eagles
2:10 Boom Gate Jets vs Sharp Rats
3:00 FMT Slaves vs Kindino Sisters
3:50 JS Warriors vs 38 Specials

Bye: 21 Red Heads
Olgeta soka gem bai i pilai fong Sande.

PNG Swimming Inc makim Pasifik Skul tim

BIHAIN long las wiken Marsh Long Kos Swimming Sempionsip long Pot Mosbi PNG Swimming Inc i makim Pasifik Skul Gem skwat.

Dispela skwat em Arthur Maikin, 10, bilong St Josephs Intenesenel Skul husat bai swim long anda 10 divison, Carmen Kolta bilong Pot Mosbi Intenesenel Skul long anda 13 divison, Judith Meauri bilong Salvation Army long anda 13, Nathan Nades bilong St Josephs long anda 13, lan Nakmai bilong Korobosea Intenesenel long anda 13, Adam Ampaoi bilong POMIS long anda 14 na Krystle Babao bilong POMIS long anda 17.

Oi pilai bai kamap long Melbon, Australia long Novemba 27 i go inap long Disemba 3.

Long wankain taim PNGSI i makim tu ol developmen na taget skwat bilong em.

Developmen skwat em Arthur Maikin (10), Carmen Kolta (13), Nathan Nades (13), lan Nakmai (13), Adam Ampaoi (14), Tahira Mulas (16) na Bruce Naru (17).

Taget skwat em Judith Meauri (13), Nicole Ellsworth (14), Dorcas Emmanuel (17), Ashley Seeto (17), Anna-Lisa Mopio Jane (18), Krystle Babao (18) na Ryan Pini (23).

Oi rekod tu i bruk long dispela taim.

Long 200m brestrok long 17 yia divison Ashley Seeto i swim na pinis long taim 2 minit na 40 seken, 50m brestrok long 17 yia divison Ashley Seeto husat i kamap long 31seken, 100m brestrok long 17 yia

divison Ashley Seeto husat i kamap long taim 1 minit 12 seken.

Long 100m fristail Anna-Lisa Mopio i brukim rekod na kamap long taim 1 minit 4 seken long sinia divison, 50m bataflai long sinia divison Mopio i kamap long taim 31.87 seken, 200m fristail long sinia divison Mopio i kamap long taim 2 minit na 18 seken, 50m fristail long sinia divison Mopio i kamap long taim 28.44 seken.

Long 100m fristail long sinia na open divison em Ryan Pini husat i kamap long taim 53.06 seken, 100m bataflai long sinia na open divison em Pini i kamap long taim 56.68 seken.

Long 50m bekstrok long sinia na open divison em Krystle Babao husat i kamap long taim 33.59 seken na long 50m bekstrok long anda 17 divison em Dorcas Emmanuel husat i kamap long taim 34.11 seken.

Long ol divison bilong ol master em Peter Kelly husat i swim long 800m fristail long 50-54 yia grup na kamap long taim 12.06 minit na i kamap tu long 100m bekstrok long 50-54 yia grup na kamap long taim 1 minit na 29 seken na 400m fristail long 50-54 yia grup na kamap long taim 5 minit na 32 seken.

Beryl Madouna long 50m bekstrok long 30-35 yia grup we em i kamap long taim 30.34 seken. Bipo taim bilong Madouna em 37.61 seken.

PNGSI i amamas long dispela sempionsip we moa long 100 swima i kamap.

Coca Cola sapatim Ragbi Supa 4's

BIKNEM sof dring Coca-cola Amatim i tromoi hevi bilong em long sapatim PNG Ragbi Yunion Supa 4s.

Kampani i tokaut long tingting bilong em long Mande dispela wik taim em i mekim wangepa sponsasip long PNG Ragbi Yunion.

Kampani bai givim K300,000 long Yunion long narapela tripela yia.

Long Mande em i givim K100,000 mani i go long PNG ragbi yunion.

Long dispela yia pilai bai kamap long Pot Mosbi long Oktoba 22 i go inap long 29.

Long taim bilong givim dispela mani Coca Cola Sauten Rijon maketing monesa Mathew Green i tok kampani i amamas long pas wantaim ragbi yunion na olsem em mekim dispela sponsasip.

"2004 Coca Cola Supa 4s salens i bin kamap gut na olsem mipela olsem sponsa i bilip dispela tingting olsem wantaim kain sapatim dispela pilai bai go strong long kantri," Green i tok.

"Long skruim yet pasin bilong givim sans long ol pilai bilong mipela long ol bikpela pilai dispela i ken hapim level pilai i go antap," em i tok.

Dispela em i namba wan taim long kain bikpela sponsasip i kamap.

Long dispela yia ol tim olsem Pogera Joint Venture Hailans (Hailans rijon), Besta Noten Reds (Mamose), Esi Loan Ailans (Niugin Ailan) na Credit Corporation Traders (Sauten rijon).

PNG Ragbi Yunion presiden Graeme Osborne i tok em i kisim bikpela amamas long kain sapatim i kam long Coca Cola Amatim na olsem em bai mekim olgeta samting long kamapim ol gutpela pilai na tu long strongim ragbi yunion.

Em i tok PNGRU bai givim sponsasip long foapela sumatin husat bai stap long Australia na lain long pilai ragbi lig taim ol i stap long hap.

Long wankain taim PNGRU developmen opisa Peter Tsiamalii Jnr i tok Ragbi 4's i gat nem.



RAIT OLGETA: Gol suta bilong Telsta Gamini Koroka i kalap egensim Paraman gol difenda Ravu Raula long Pot Mosbi gren fainol las Sarere. Telsta win 51-43.



BIHAIN TRU: Tarangau kepten (namel) i kisim sil long mausman bilong SP Brewery. Sanap lukluk em Pot Mosbi lig deputim siaman Boino.



STAILI Bihain long ol bikpela samting sampela taim i nogat inap spes long go bek long haus. Dispela i wankain long ol tripela manki husat i nogat spes long ka bilong ol na olsem ol i mas sindaun long but bilong ka bilong ol olsem ol liklik pisin.



GUTPELA TRU: Oi anda 8 manki i kisim medol bilong ol bihain long ol i mekim gut long las wiken nesanel long kos sempionsip long Pot Mosbi.



LUKAUTI! Kain strongpela pilai bilong Esco Telsta long Pot Mosbi netbol A Gret gren fainol long las Sarere i lukim gol kipa bilong ol Gamini Koroka (GS) i i kalap na kisim bal long Paramana gol kipa Ravu Raula. Telsta win 51-43.



WIN: Post Puma senta Joshua Lapa husat i kamapim gutpela pilai long SP Pot Mosbi ragbi lig A Gret gren fainol long las Sande i lukim hia em i putim trai. Em i pilai gut tasol strong i sot na olsem Hekari Tarangau i win 26-24.




BILONG MI: Em samting SP Rutz kepten Nathan Vincent i tok taim em i kisim bal na ronawe long ANZ University midfila Steve Mali long Pot Mosbi primia soka gren fainol long las Sarere. Rutz win 2-0.



SEMPION: Man nogut bilong swim long ol wara bilong PNG, Saut Pasifik na sampela wara bilong Australia Ryan Pini i kisim medol bilong em bihain long em i winim 50 mita bataflai long PNG Marsh Long Sempionsip we i bin kamap long Pot Mosbi long wiken.



MEKIMSAVE: Koreksinol Sevis ben i mas na winim paip ben bilong ol long statim Pot Mosbi A Gret gren fainol namel long Hekari Tarangau na Post Puma long las Sande. Tarangau win 26-24.



HELPIM: PNG Kriket Bod siaman Mike Nades (sanap long namel) i amamas long nupela kompyuta em Datanets i bin givim long Bod long las Fraide.

Ol poto ANDREW MOLEN



Inap sapot long win: Murray

NOT Kwinslen Cowboy kisim balus na go long Sidni aste i tok gutpela sapot long taun bilong ol- Townsville bai helpim ol long win.

"Win i save kamap wantaim gutpela sapot na olsem i gat bikipela sapot long baksait bilong mipela," kosa Graham Murray i tok.

"Mipela i makim bikipela provins na olsem i gat inap manmeri i sapatim mipela. Tasol long taim pilai i kamap em wei yu pilai i save lukim mak bilong kamap bilong pilai bilong yu." Ol i makim pinis man husat bai redi long kisim ples bilong namba 17 pilaia sapos sampela samting i no gut long sampela taim bihain. Dispela man em em Brenton Bowen, bikipela brata bilong ful Matt Bowen. Long wankain taim Murray i kisim bek kepten Travis Norton bihain long ol hevi i gat long baksait bilong em.

Lukluk long ki pilaia-

Matt Bowen (fulbek): Husat i taim 23 krismas long dispela mun Septemba we ol i save kolim nik nem "Matty" i bin pinisim 2004 sisen long bikipela mak. Dispela i lukim em i makim Australia long stap long Kangaroo tim we i bin pilai wantaim Inglan na Amerika las yia. Wantaim kain save em i gat long mekim i go insait long ol fainol Mathew i wanpela bikipela boi bilong tim long helpim tim i winim dispela gren fainol. Long taim em i no pilai Matty i save laik stap tasol long haus na lukluk long TV na harim gutpela musik long redio stesin em i laikim. Em i smelim gren fainol sampela taim pinis na nau i laik pinisim 2005 sisen gut.

Ty Williams (wing): I gat 24 krismas bilong liklik taun Innisfail i wanpela top man long tim i wankain olsem Bowen. Planti man i ting spit bilong em i save ron olsem spit bilong lait. Em i bin mekim gut long 2004 sisen na i wanpela bilong ol pilaia husat i helpim ol Cowboy long hamarim gut ol narapela tim. Difens o banis bilong em i nogut tru olsem na planti ol birua pilaia husat i kisim bal i save em bai i no inap stap longwe long ol. Em i makim Kwinslen long pilai long Orijin pilai.

Jonathan Thurston (hap bek): Dispela 22 yia manki i gat nem nogut long pilai long kainkain hap em i laik long pilai. Em i makim pinis Kwinslen sait we gol kik bilong em i lukim Kwinslen i winim namba wan Stev ov Orijin pilai long 2005. Em i gat gren fainol nem aninit long nem bilong em bihain long em i winim 2004 NRL gren fainol Canterbury Bulldogs. Em i pilim pinis kain swit bilong winim gren fainol na olsem dispela kain hangre bai mekim em i laik long kisim gen dispela amamas. Wantaim kain spit na lukluk bilong em long ritim pilai bai i helpim gut tru ol Cowboy.

Travis Norton (lok na kepten): Nik nem "Tex" i gat 29 krismas. Em i pilai long klostu olgeta Stet ov Orijin long taim em i stat pilai long Fes Gret long 1995. Gutpela wok bilong em olsem lidaman long 2004 i lukim Cowboys i go insait long NRL gren fainol namba wan taim we ol i lus long Canterbury Bulldog las yia. Gutpela stail pilai bilong em long rak i tukim em i save mekimsave gut long ol birua pilaia bilong em. Save bilong em long Orijin i gutpela mak bilong em i helpim Cowboys long winim dispela gren fainol. Long ol arapela samting em i mekim sapos em i no pilai em i tok em i laik kamap paia paitman.

Cowboys ful skwat: Matt Bowen, Ty Williams, Josh Hannay, Paul Bowman, Matt Sing, Jonathan Thurston, Brett Firman, Paul Rauhihi, Aaron Payne, Shane Tronc, Steve Southern, Luke O'Donnell, Travis Norton (kepten).

Ol senis em David Faiumu, Justin Smith, Mitchell Sargent na Jacob Lillyman.

Skelim ol strong



Blut bungim Tigers: Sheens

WEST Tigers kosa Tim Sheens i tok yangpela sait bilong em i redi long kisim blut taim ol i bungim Not Kwinslen Cowboys long NRL gren fainol long dispela Sande nait.

"Ol i gutpela poroman na olsem ol i save pilai long sapatim narapela narapela," Sheen i tok. "Em i namba wan samting ol tim i laik long mekim... em long pilai long helpim wan pilaia bilong yu na kisim blut long helpim em."

Ol Tigers maski i kam bihain i mekim gut long las tripela raun pilai bilong ol we dispela i mekim ol nau i go insait long gren fainol. Long stat bilong 2005 sisen ol i nekim Cowboys 50-6 na dispela ol i no lus tingting.

Tasol kepten Scott Prince i tok ol i no wari tumas long dispela mak. "Mipela i wok long lukluk go bek long las win tasol nau ol i gat narapela sans moa long bungim mipela gen," Prince i tok.

"Ol i pilaia tupela gutpela sait- Storm na Parramatta na olsem ol i wok long kamapim sampela gutpela pilai. Mipela i mas was gut long pilai bilong mipela."

Lukluk long ki pilaia:

Brett Hodgson (fulbek): I gat 25 krismas na bilong Liverpool long Nu Saut Wels. Em i bin makim Nu Saut Wels tim long pilai long Stet ov Orijin pilai na i kam wantaim save bilong banisim birua pilaia. Em i amamas long pilai wantaim West Tigers na hop long pinisim gut 2005 sisen wantaim gren fainol win. Man husat em i laikim tumas long pilai bilong em lan Hindmarsh. Meri husat i strongim tingting bilong em long pilai ragbi em meri bilong em.

Daniel Fitzhenry (wing/utiliti): Dispela manki bilong Mackville, Nu Saut Wels i traim yet long kamapim ol bikipela samting stat long taim em i stat long pilai long primia klab long 2002. Long dispela taim em i stat wantaim ol Saut Sidni. Em i ting olsem pilai wantaim West Tigers i min olgeta samting long laip bilong em. Em i laik lukim dispela yia i pinis gut na olsem hatwok bilong ol i karim kaikai. Sapos em i no pilai ragbi em i laik long wok long eapat.

Benji Marshall (faiv eit): I gat 20 krismas tasol i mekim nem pinis long makim Nu Silan pinis long kamap long ol bikipela Tes pilai. Las pilai em long Septemba, 2005 tasol we em i makim NZ long pilai egensim Australia. Tasol pastaim long dispela em i makim pinis Nu Silan long pilai egensim Australia skulboi ragbi fig tim. Bikipela mak em i go long em long winim Ragbi Wol Sevens. Em i lukim olsem winim 2005 NRL gren fainol wantaim West Tigers i bikipela samting.

Scott Prince (half bek/kepten): I gat 25 krismas na stat pilai long primia divison long 1998 long taim em i joinim Canberra Raiders. Em i bin stap wantaim Cowboys bipo na i bin pilai wantaim ol pinis na olsem em i save long stail pilai bilong ol. Dispela i givim em gutpela save long stiaim ol Tigers long katim kona na mekimsave long ol Cowboy. Em i makim Junia Kangaroo long 1998 na stap long Nu Saut Wels long pilai long 2004 Stet ov Orijin pilai. Em i gat bikipela rispek long pilai wantaim Tigers na i ting Cowboy tu i gat save bilong pilai tu. Sapos em i no pilai em i laik stap malolo wantaim famili.

Tigers ful skwat: Brett Hodgson, Daniel Fitzhenry, Shane Elford, Paul Whaturia, Pat Richards, Benji Marshall, Scott Prince, Anthony Laffranchi, Robbie Farah, John Skandalis, Ben Galea, Mark O'Neil na Dene Halatau. Ol senis em Liam Fulton, Chris Heighington, Bryce Gibbs na Todd Payton.




Matt Bowen



Brett Hodgson



Ty Williams



Daniel Fitzhenry



Jonathan Thurston



Benji Marshall



Travis Norton (kepten)



Scott Prince (kepten)

AusAID mekim AIDS toksave wantaim PNG netbol



LUKAUT! AusAID mausmeri Kristen Pratt i givim ol bal long PNG netbol federesen presiden Emily Taule.

AUSTRALIA Ejensi bilong Intenesenel Dvelopmen (AusAID) long Mande dispela wik i bin givim moa long 100 bal i go long PNG Netbol Federesen.

Dispela em long wok bilong pait egensim sik AIDS. AIDS em sik i nogat marasin bilong em we sapos man i kisim i bilong dai tasol.

AusAID i givim dispela ol bal long taim PNG Netbol Federesen i holim nesene sempi-sip bilong em long Pot Mosbi.

Long taim bilong givim ol bal AusAID kaunsela Kristen Pratt i tok kantri i save kamap gut taim ol manmeri i gat gutpela na strongpela bodi. Na tu long taim man na meri i wok bung wantaim. "I gat mining taim olgeta memba bilong komyuniti i strong na i nogat hevi long bodi. Na olsem olgeta i kisim gutpela skul na olsem ol mekim gutpela wok long kirapim wok dvelopmen long kantri," Pratt i tok.

Em i tok long kastom bilong PNG ol meri i namba tu long ol samting. Tasol em i tok kain pasin bai i no inap long helpim kantri sapos kantri i laik dvelop hariap.

"Larim ol meri i wok wantaim ol man na long ol man i no ken bagarapim ol meri i mas bikpela wok bilong ol pipel bilong PNG."

"Bikpela toktok em long PNG i mas gat gutpela gavman long olgeta level long lukim olsem olgeta memba long komyuniti i mekim wok long dvelopim na kisim servis long helpim sindaun bilong ol.

"Mi hop olsem wantaim dispela toktok na wantaim ol bal ol manmeri i mas mekim olgeta samting long stopim sik AIDS, long ol noken bagarapim ol meri na olsem olgeta i mas mekim ol gutpela samting long strongim na sapotim laip," Pratt i tok.

Sentrol sempion bilong junia netbol

SENTROL netbol tim i winim olgeta pilai bilong ol long anda 13, 15, 17 na 21 long PNG netbol junia nesene sempionsip long Pot Mosbi aste.

Long taim bilong tokaut PNG netbol jenerol seketeri Julianne Maliaki i tok kain win i soim olsem standet o mak bilong ol meri long pilai netbol i kam antap.

Long anda 13 Sentrol i go wantaim Lagatoi we ol i win 14-12, anda 15 we ol i hamarim Poreporena 16-11, anda 17 we ol i winim Wes Nu Britan 28-13 na long anda 21 divison ol i stopim Pot Mosbi 24-21.

Maliaki i tok Sentrol tim i kamap bihain long ol netbol asosiesen long ol distrik olsem Rigo, Abau na Aroma kos i holim ol pilai.

Em i tok long taim ol junia pilai i pinis tede ol bai malolo na eksekutiv bai holim AGM bilong ol.

Long tomora ol sinia divison olsem A, B na Masta divison bai stat.

Bihain long ol gren fainol long Sande PNGNF bai makim nesene skwat bilong em long redim tim long go pilai long rijinol sempionsip long Australia na wanpela Tes pilai wantaim Singapore long 2006. Ol bai makim tim tu long 2007 Samoa Saut Pasifik Gem na wol kap pilai.

PNG skulboi Kundu ragbi lig tim gat wanpela sans

PAPUA Niugini Kundi ragbi lig tim bai mas winim Australia sapos ol i laik go insait long wol kap gren fainol.

Tasol long aste PNG ragbi futbol lig sif eksekutiv opisa Jeff Wade i tok ol manki bilong mipela i no mekim gut wantaim Rasia long long Tunde.

"Sori tumas olsem ol i lus long Rasia 26-0 long Tunde na sapos ol i winim Australia nau nait ol bai gat sans long go insait," Wade i tok.

Rasia nau bai pilai wantaim Frans long eliminesen fainol. Wina bilong tupela bai go insait long fainol wantaim wina bilong pilai namel long PNG na Australia.

PNG Kundu ragbi lig tim i bin mekim gut long ol namba wan pilai bilong em taim ol i nekim Scotland 64-0 las Fraide na Barbarians 44-8 long Sande.

Bikos long kain bikpela skoa ol i mekim point bilong ol i winim poin bilong ol Australia na Rasia 1.

Long pilai bilong ol ol manki long blek, red na gol kala i yusim gut spit na gutpela tingting long mekimsave long ol tim bilong Scotland na Barbarians.

Em i bin gutpela inap Tunde dispela wik we i lukim turangu ol boi i go daun long Rasia. Tasol sapos ol i ken daunim ol biknem Australia tede i nogat as bilong stopim ol i go insait long gren fainol long Sarere.

PNG i stap long pul B wantaim Rasia 1, Barbarians na Scotland na pul A i gat Australia, Frans, Rasia 2 na Itali.

Dispela em i namba wantaim PNG



SAMTING TRU! PNG Kundu tim we i wok long mekim gut long Yut Ragbi Wol Kap long Rasia bai pilai wantaim Australia tede long semi fainol.

junia tim i go insait long kain bikpela pilai olsem. em i stat tu long PNGRFL i kirapim na dvelopim ragbi lig pilai long kantri.

Sapos em i kain mak olsem dispela i bai lukim PNG bai kamapim ol strongpela pilai long wantaim ol kain kantri olsem Australia, Nu Silan na Inglan.

BB United sempion bilong Goroka lig

James Kila i raitim

BB TRADING United tim i soim wanpela trupela kala bilong ol taim tim bilong ol i winim gren fainol pilai long A Gret na A risev long Goroka ragbi lig gren fainol las Sande.

Long A Gret ol United i hamarim EDZ Cowboys 20-12 na long A Risev ol i stopim Brothers 10-8.

Ol yangpela pilai bilong United i mini bisnis taim ol i go insait long fin na gem bilong ol i go stail na resa stret.

Wanpela yangpela man bilong Korofeigu, Henry Seka husat i pilai long win i soim tru olsem bagaros ya em stail wing stret taim em i putim kamap gutpela gem long banisim ol birua bilong EDZ Cowboys.

Ol i pilai strong tru olsem tim taim ol i lokim ol birua bilong ol na dispela i mekim na bagaros ya Seka i ron olsem wanpela sinek i go putim tupela trai.

Tupela wiken i go pinis Seka i bin soim staim na kala bilong em taim BB Trading United i winim Nowek Royals. Seka i bin lokim tru wanpela winga bilong Royals Alphones Kapil na United i bagarapim sindaun bilong Royals long kisim ples insait



WIN: Sapota bilong BB United Isepo Erekafo i soim han long win.

long gren fainol.

Memba bilong Okapa, Tom Amukele husat i bin stap long lukim dispela pilai i tok amamas long tupela tim long soim gutpela klinpela pilai insait long fainol. Nogat trabel i kamap long pilai graun na ol manmeri jusat i go lukim piai i bin amamas tru long pilai bilong tupela tim wantaim.

Tredera bilong BB Trading United na man husat i bin wok strong tru long bungim ol pilai long wok strong long kirapim klab, Isepo Erekafo we em i bin mekim bikpela tok amamas long ol pilai bilong em long winim gren fainol long tupela divison.

Erekafo i bin go pas long kirapim gen pasin bilong wok bung wantaim insait long klab tam em yet i bin go lukim spona Brian Balifun husat i jenerol menesa bilong BB Trading long Goroka.

Taim tupela i pasim tok Balifun i to olsem Erekafo em wanpela opisel husat i gat gutpela tingting na man i sanap strong long ol yangpela pilai.

Wanpela komyuniti lida bilong Sipiga haus-lain we planti bilong BB Trading United i save stap long en em Bam Menanga i givim bikpela tok amamas long i go long Erekafo long hatwok na tuhat bilong en long mekim dispela tim i kamap olsem gutpel tim insait long ragbi lig kompetisen.

O pilai i givim bikpela tok amamas i go long spona BB Trading wantaim menesa bilong em Balifun long givim sapot long klab long dispela yia.

Trukai yut spot go long Rabaul

RABAUL bai narapela taun em Trukai Yut Spot aninit long PNG Spot Komisen bai go long em long narapela wik.

Long redi long dispela kos Rabaul distrik spot opisa Donald Tokua na PNG Spot Komisen rijinol opisa Ford Sahembo na Allan Joseph i tok olgeta samting i redi long holim dispela kos.

"(Rabaul) distrik edministresen i amamas long kain kos i kamap long distrik long wanem wantaim kain kos ol manmeri bai i gat gutpela save long

kamapim na ronim ol pilai na olsem ol bai ken tokaut gut olsem spot i no samting bilong amamas tasol," Tokua i tok.

Em i tok wantaim amamas em ol manmeri i save i kisim long pilai ol i save kamapim poroman pasin, wan bel na mekim ol manmeri i stap strong long laip.

Moa long 40 manmeri i givim nem long kamap long dispela kos.

Progrem menesa Scot Vavine i tok wantaim spot bilong Trukai Industri

dispela progrem i krungutim olgeta taun na ples long Papua Niugini.

Sentrol na Galf distrik yet i bin kisim mao long 100 kos long dispela progrem na kamapim ol gutpela pilai.

"Mi amamas long kamap bilong dispela progrem we i hopim tingting bilong planti manmeri na helpim planti manmeri long kamapim na lukautim ol pilai," Vavine i tok.

Moa yet em i amamas long sapot bilong Trukai Industri we i sposaim dispela progrem stat long 1995.

Hawks sempion bilong Madang ragbi lig

Kevin Pamba long DWU i raitim

HAWKS i nupela Madang Ragbi Lig primia tim bihain long ol i winim Tarangau 13-10 long wanpela strongpela pilai long las Sande.

Wantaim sil ol i winim tu K1500 praismani em Yama Grup ov Kampani i givim.

Na Hawks winga Malcom Komb i kisim man-pilai-prais em K150 long Yama Grup ov Kampani i givim wantaim tropi em Kitao famili i givim.

Tarangau husat i kamap namba tu i kisim rana ap tropi wantaim K1000 praismani long Lae Builders Kampani.

Long dispela ol pilai Yama Grup ov Kampani i lusim K5000 mani olgeta long wina bilong wanwan divison long praismani na ol tropi wantaim.

Long ol Risev Gret Norths i win na kisim sil wantaim K700 praismani na MRM Panthers i kisim rana ap tropi wantaim K500 praismani.

Long Anda 19 divison Panthers i win na kisim sil wantaim K500 praismani na Royals i kisim rana ap tropi wantaim K250 praismani na long Anda 17 divison Norths i win na kisim sil wantaim K500 praismani na Warriors i kisim rana ap tropi wantaim K250 praismani.

Long taim bilong givim ol mani i go long ol tim siaman bilong Yama Grup ov Kampani i tok long 2006 sisen totei praismani bilong ol wina bilong wanwan divison bai go antap long K15,000.

Wina bilong primia bai kisim K5000 praismani na rana ap tim bai kisim tropi wantaim K2500 praismani.

Dispela kain mak i lukim Yama Grup ov



RAIT YAH! Namon Hawks kepten Isaac Sumunaa i kisim sil long LBC Madang Brens menesa Shane McCarthy (han sut). Long han kais em Madang lig presiden Max Kitao na baksait em Yama Grup ov Kampani menesing dairekta Peter Yama.

Kampani i namba wan kampani long mekim bikipela sponsasip long Madang ragbi lig.

Memba bilong Usino-Bundi i bin mekim yau i pas long Ron Albert ragbi lig pilai graun long taim em i tokaut long tingting bilong em long sponsaim Madang ragbi lig long 2006 sisen.

Em i tokaut long dispela tingting bilong em

taim em olsem petron bilong Madang ragbi lig long taim em i givim ol sil na praismani i go long wina bilong wanwan ol divison.

Long primia tim Hawks ol i win bihainim tasol promis ol i mekim long stat bilong sisen olsem ol bai mekim olgeta samting gut long pinis gut.

Tarangau klab go antap long POM soka lata



KIRAP GEN: Tarangau soka tim we i wok long mekim gut long Pot Mosbi soka resis long divison.

NEM Tarangau i no moa pairap long Pot Mosbi soka premia divison tasol i wok long surik isi isi kam antap bek gen long lata.

Na i no ol woda o ol opisa bilong kore-skinol sevis i mekim i kam antap. Nogat. Em ol pikinini bilong ol we i mekim wantaim tripela bipo kalabusman Jack Apakalli, Chris "Frooks" Sea na Steven Basa.

Long wiken i go pinis Tarangau i kilim paia bilong Ubog, wanpela nupela tim insait long Rigo wantaem 1 nil skoa.

Wantaim bikipela sapot long ol sapota long Bomana, pilai i bin kisim tripela minit tasol na ol Tarangau i pairapim umben bilong Ubog taim kepten bilong ol Issac "Phantom" Yanuwe" kikim wanpela isi gol.

Pilai long sait bilong tupela tim wantaim i bin strong tru na skoa stap olsem tasol i go inap hap taim.

Long stat bilong seken hap dispela i

lukim Ubog i winim planti bal tasol ol straika bilong ol i abrus long painim umben bilong ol boi Tarangau.

Tupela tim wantaem i pilai strong tumas na pinisim gem wantaem 1 nil skoa. Dispela win bilong ol boi Tarangau nau i givim ol sans-long traim strong bilong ol long narapela yia taim ol i ron long namba wan divison.

Kepten bilong Tarangau Issac "Phantom" Yanuwe i givim bikipela tok tenk yu i go long Koreksinal Sevis Emplois Asosiasen long helpim bilong ol long givim wanpela nupela set unifom long tim long las minit.

Bikipela tok tenk yu i go long Belltek long givim marasin blong wasim unifom na Mainlan Plaming long givim bikipela eski long ol.

Na long pinisim toktok bikipela tenk yu tru i go long ol Tarangau ragbi lig pilai na ol sapota long sapot bilong ol long pilai graun long taim bilong gren fainol.

Pot Mosbi rot rana

LAS wik Sarere ol rana bilong Pot Mosbi i bin bung long Simon-Bilong-Sairini Klinik, Hohola.

Pater Jude Forde husat i save wok long dispela klinik i bin mekim dispela ron. I gat tripela ron 1.5km, 4.7km na 8.2km.

Olgeta resis i save raun pas long Hohola na i gat planti liklik manuten long dispela raun. Wantaim dispela i gat planti dog na pothol nabaut na ol maunten i save paulim o rana.

Long sotpela resis Richard Waninara i mekim gutpela spit na em i kamap namba wan long taim 5.5 minit

Long 4.7km resis i nogat wanpela man bai winim Milton lakosi husat i kamap long 16.08 minit we em i pinis tupela pas long Akis Ivia. Ivia i pinis long taim 18.2 minit na Noko Negosa i pinis long taim 18.29 minit. Sampela ol rana i bin stat long 8.2km resis tasol ol ipitim bodi bilong ol les pinis na i bin pinis long 4.7km resis tasol.

Long 8.2km resis Simon Pinampio i kamap namba wan long taim 30.25 minit na em i bin raunim dispela resis long tripela taim wan-

taim ol manmeri husat i save spit long tumas.

James Gurumi em i kamap namba tu long taim 31.41 na Roger Hollis i stap long ron gutpela yet we em bin kamap namba tri na kamap long taim 32.05 minit.

Insait long "Must Run Salens" James Gurumi i stap antap yet we em i kamap yet long 345.7km. i luk olsem i nogat wanpela man bai winim em nau. Ples namba tu i go long Paulus Opus wantaim 317.4km na ples namba tri i go Josek Bomida husat i mekim 310.4 km.

Sapos ol dispela lain bai pinisim ol longpela resis long POMRR i go long yia i pinis ol bai kisim namba wan, tu na tri prais. James Gurumi em i no bin lusim wanpela longpela resis insait long dispela yia, Paulus Opus em i lusim wanpela tasol.

Em hatwok bilong tru long ron ronim olgeta longpela resis na dispela salens em i save hapim kain resis olsem. Insait long Pot mosbi i gat planti manmeri i gutpela long long distenet resis resis. Singaut nau i go long manmeri long kam join na ron.

Hap hap nius

Telstars winim 30 netbol taitol

ESCO Telstars i gutpela tumas long pilai we dispela i lukim ol i win gut long Monier Paramana 51-43 long strongpela Pot Mosbi divison wan gren fainol las Sande. Telstars i bin mekimsave long ol Paraman wantaim ol longpela pilai bilong ol we i mekim isi long ol i kisim bal antap na holim longwe long han antap ol Paramana difenda. Telstars i lid long planti hap bilong gem tasol Paramana i kam bek strong liklik namel long seken kwata. Taim ol Telstars i lukim olsem banis bilong ol i slek liklik ol i taitim ken na Paramana i kisim taim. Ol i soim strongpela pilai inap taim pinis. Long wanpela hap Paramana i bin tu poin bihain tasol long ol. Tasol sori tumas ol i no strong tumas na olsem ol Telsta i ronawe long ol.

PS Rutz sempion bilong POM soka


OLGETA manmeri husat i kamap long lukim gren fainol bilong Pot Mosbi soka i ken tok PS Rutz i nap tru long kisim taitol bilong dispela sisen taim ol i winim University 2-0 long Sarere. Dispela em bilong wanem ol i pilai "soka" stret. Ol pilai i sanap tasol bal i ron i go i kam namel long ol. University tu pilai straon tasol taim ol i lukim olsem ol i kam bihain, ol i hariap-hariap na dispela i bagarapim gem bilong ol. Em i stat taim Eric Komeng bilong PS i skoaim fes gol bilong ol long wanpela dairek penotti. I no long taim ol beks bilong Uni i ai silip na PS i skoa gen taim ol i salim wanpela bal i go kwik taim tru long straika, Francis Tulem husat i no westim taim long skoaim namba tu gol bilong ol. Uni i kam bek strong long seken hap tasol PS i luksave na strongim difens bilong ol we ol i holim inap long ful taim.

Tarangau sempion bilong POM lig

Em i no olsem ol narapela gren fainol bilong Pot Mosbi we i pulap stret wantaim ol sapota tasol dispela i no stopim strongpela spirit bilong gem i go het. Husat ol i kamap i lukim wanpela gren fainol we planti bai i no inap lus tingting long en long longpela taim i kam. Hekari Tarangau na Post PNG Puma i mekim husat i kamap long lukim gem i sanap long finga bilong lek bilong ol wantaim strongpela gem bilong ol. Tupela tim wantaim i bekim ol trai i go i kam na tingting bilong husat tru bai i winim gem i no klia inap faiv-eit bilong Tarangau Dickson Sibiya i skoa aninit long pos long las faivpela minit long putim levelim skoa poin wantaim Puma 24-24 na taim senta, Keith Kiwana i kikim konvesen dispela i lukim win bilong Tarangau. Las foapela minit Post Puma i kam bek strong long skoa gen tasol taim i sot long ol. Long fultaim Tarangau 26 winim Post Puma 24.

Lae holim nesanel etletik sempionsip

LAE siti bai paia lait gen taim ol ron manmeri i hafim lek long nesanel sempionsip long dispela wiken. PNG Etletik opis i tok ol bai lukim ol bikipela ron i kamap long wanem planti ol gutpela ronmanmeri bai kamap na traim bun. Long dispela taim nesanel skwat bai traim long kamapim yet ol strongpela ron bihain long gutpela ol ron ol i mekim long Palau mini Gems. Wantaim dispela 12-pela etlit tu i kam bek long kantri long Osenia Gron Pri long Australia las wik na sambai long go insait tu. Ol resis i stat tede na pinis long Sarere dispela wik.



WANTOK




Lukim stori long
tupela tim long
Pes 29

PNB Kundu Rapi
at Wampela



VS





DELTA

**POWERED BY TOYOTA
DIESEL ENGINE**

*Proven
in
PNG*

**Ela Motors
TRUCKS**

TOYOTA TSUSHO (PNG) LTD.

FOR MORE INFORMATION CONTACT
Jim Maxwell - Ph 3229400
Email : jmaxwell@elamotors.com.pg

WIDE CAB LWB 3 TONNE CARGO TRUCK

Special Offer

K69,990*

DRIVE AWAY!

Offer Expires :
31 / 10 / 2006.



*Conditions Apply

WE PROVIDE ✓ TOTAL SALES ✓ GENUINE PARTS & SERVICE BACKUP ✓ FINANCE ✓ LEASE PACKAGES ✓ THROUGHOUT 15 BRANCHES NATIONWIDE

The publisher of the newspaper is Justin Hansu Kili, MBE of Section 58, Allotment 3, Office 2, Waigani Drive